

# DXUS YUWE SAN MARKOS FXI'JNI

---

**Juan Bautista nasa u'pnimée kiwesu Dxus yuwe's pta'sxni**  
(*Mt 3.1-12; Lk 3.1-9, 15-17; Jn 1.19-28*)

**1** <sup>1</sup>Dxus Nçxi'k Jesukristo fxi'zeni's pta'sxnisa na'wëk takh: <sup>2</sup>Txãniitey Dxus yuwe pta'sxsa Isaiasa' na'jînaga fxi'j Dxus we'weni's: Teeçx adx yuwe pta'sxsa's kajaçthu iidx yaçte, iidx dxi'ja's pheu'khan.

<sup>3</sup>Nasa u'pnimée kiwesu sus we'wenik pthûuse' na'jîna:

Dxus pa'jwa'ja's mpheu'jwe, dxi'ja's ku'le phaadena jî'k.

<sup>4</sup>Txã'wë Isaias we'weni kxtey yuuwa'j ähte', Juana' nasa u'pnimée kiwesu vxyaak nasatx bautisâyna. Sa' na'jînak pta'sxi':

—Pkaltxi nvxihtçxa Dxus tasxte misxawedwe, yu'te ya'bautisâyna, kxah i'kwe'sxtxi' Dxusa' peltunaîna.

<sup>5</sup>Juan we'weni's wësê'jya' pa'jtx Judea kiwesuwe'sx vxite' Jerusalenuwe'sxwa. Sa' pkalsatha'w jîna Dxusa's perdon pêjxna pa'jsatxi' Juana' Jordan yu'walate bautisaî'k.

<sup>6</sup>Juana' kamelxo khas atxh athçxa kha'txku jxtudu', sa' txajx û'nisa yu' khâ'sx wala çxhi'dx miltxi yu'. <sup>7</sup>Sa' Dxus yuwe's na'jînak pta'sxi' nasatx:

—Adx e'suh teeçx yuja' txã' adxte jxthaakwe äjâwa'jsa'. Adxa' txajx pelgatxi weççxáa yuhtxwa khihbxa' äjâwa'jmeesath. <sup>8</sup>Adxa' i'kwe'sxtxi' yu' yakhçxáath bautisâyya' äjâ', naapkaçxha' txã' i'kwe'sx ûuste Dxus Espiritu's kxu'akhe'jya' äjâwa'jsa' jî'k.

**Jesus ya'bautisâyni**  
(*Mt 3.13-17; Lk 3.21-22*)

<sup>9</sup>Txãn ensu' Jesusa' Nasaret çxhabu kasejk Galilea kiweju. Sa' Juan tasxte pa'the', Jordan yu'walate bautisâyku. <sup>10</sup>Aça' yu'ju kasejeççxa', uyku cielu phaateeçte. Naapkaçxha' Espiritu' tub çxihme na'wësa txajx kajkwekhê kîjaçtek uy. <sup>11</sup>Sa' cieluju teeçx na'jîna we'weniwa pthûusek:

—Idxa' adx Nçxi'k wala wedxnisag. Iidxpa'ga wala weçxana üsthu jîk.

**Eçxthê'j Jesusa's ísxii wëeni***(Mt 4.1-11; Lk 4.1-13)*

<sup>12</sup> Txãa dudtey Espiritu' Jesusa's pe'jna u'kh nasa u'pnimée kiwesu.  
<sup>13</sup> Aça' Jesusa' kuarenta enku kxtee u'pu' yu'kh niimal ksxavxyte.  
 Kxtee u'pte', eçxthê'ja' pa'kh ewmée vxit wëeçxa. Aça' txãa e'su' Dxus  
 angleswe'sxwa pa'jtx pu'çxya'.

**Galilea kiwesu Jesus mjiiya' takhni***(Mt 4.12-17; Lk 4.14-15)*

<sup>14</sup> Juana's karcelte kxuuphni e'su', Jesusa' Galilea kiwen u'kh Dxus  
 jxkaahwa'ja's pta'sxya'. <sup>15</sup> Sa' na'jínak pta'sx:  
 —Ena' ãjãça'. Dxus jxkaahwa'j ena' utxa üsa'. Aça' i'kwe'sxa' pkaltxi  
 nvxihtçxa Dxus tasxte misxawedwe, sa' Dxus yuwe ewte nvxiitwa'jsa's  
 üuste myu'akhwe j'i'k.

**Wedx uwesáa pahzsatx Jesus pa'yani***(Mt 4.18-22; Lk 5.1-11)*

<sup>16</sup> Txãa e'su' Jesusa' Galilea íkh wala pukasu u'jweççxa', uyku  
 pxakhsatx Simon Adreswe'sxtxi. Txãawe'sxa' wedx uwesaatx yu', txãasatx  
 wedx ukhe's íkh walate akhna üsu'. <sup>17</sup> Aça' Jesusa' pa'yak:  
 —Adx yakh myuhwe, aça' i'kwe'sxtxi' Dxus jii nasaa pkhakhwa'jsa vxitu'nja.  
<sup>18</sup> Txã'jçpkaçxha', txãawe'sxa' wedx ukhe's nvxihtna' Jesus yakh u'jtx.  
<sup>19</sup> Txajü' Jesusa' ki' u'jçxa', Zebedeo nçxi'kwe'sx pxakhsatxku uy,  
 Jakobo Juanwe'sxtxi. Txãawe'sxa' wedx ukhe's pâ'khnatx u'p yu' barkote.  
<sup>20</sup> Aça' pa'yak. Naapkaçxha' txãawe'sxa' ney Zebedeo's vxite pu'çxsa yakh  
 barkote nvxihtna', Jesus yakh u'jtx.

**Eçx iiyamunisa***(Lk 4.31-37)*

<sup>21</sup> Txajü' Kapernaum çxhabe pa'jçxa', Jesusa' kaapiya'jya' takhku sapatu  
 jxkaase ensu judiuwe'sx pkhaakhenite. <sup>22</sup> Aça' Jesus kaapiya'jni's wësê'jçxa',  
 nasa' wala kuh yajxna neeyüutx, txã'wë leya's kaapiya'jsawe'sx na'wëmée,  
 nwëese'jwa'ja's üukhnus we'wena kaapiya'pha'ga.

<sup>23</sup> Txãa pkhaakheni yatte teeçx piçthê'j eçx iiyamunisak üsu', sa'  
 na'jínak sus we'we:

<sup>24</sup> —Jesus, Nasarethuwe'sx, kwe'sxtxi' çkîh ya'waga? ¿Ivxiituya' wá'ga  
 yuwé'? Idx kimtewa jiith. Idxa' Dxus kaahnisag jíte', <sup>25</sup> Jesusa' na'jínak  
 üusçxa we'we txãa eçxa's:

—Sxuuna' myüu, sa' naa piçthê'j üusu mkaaseh jina jxkaathe', <sup>26</sup> txãa  
 eçxa' nasa's kaywëçxpajna juuna' kweeyi'jçxa kasejk. <sup>27</sup> Txã'wë yüute',  
 nasa' jxukaysa üukhçxa na'wëtx puutx paapëyi':

—Naa piçthê'ja' çkimna? Txajx we'weni' çkîhtxki açki'tx eçx yuhwa nwêesê'je'? jî'tx.

<sup>28</sup> Jesus txã'wê yūuni's wala dud jiyutx Galilea kiwesuwe'sx jxuka.

**Pedro nyu nji'ja's Jesus nuykatxhini**

*(Mt 8.14-15; Lk 4.38-39)*

<sup>29</sup> Txajū' judiuwe'sx pkhaakheni yatu kasehçxa', Simon Adreswe'sx yatnak u'j, Jakobo Juan yakh. <sup>30</sup> Aça' kxtee yu' Simon nyu nji'ja' kakwesektek açã'na ūsu'. Aça' Jesusa's pta'sxtxi txã'wê açã'sa ūsa' jīna. <sup>31</sup> Txajū' Jesusa' kūhçxa kuseju pu'kisku, naapkaçxha' dudtey kakweseka' ūçxhak. Txajū' kiiteçxa selpiiya' kasejk.

**Jxuka çxhi'dxiçte maazkuéesatxwa nuykatxhini**

*(Mt 8.16-17; Lk 4.40-41)*

<sup>32</sup> Txajū' çxhi'dxna kijaçte', jxuka açã'satx Jesus tasxte nuypa'jtx vxite' eçx luuku vxitnisatxwa. <sup>33</sup> Aça' çxhabte nasa' jxuka kūhtx vxitxte thegya'. <sup>34</sup> Txajū' Jesusa' nuykatxhik fxiyfxiy wee ji'phsaxwa, sa' eçx luuku vxit-satxwa wala kutxi'kh nasaa ūusu. Txāa eçxa' Jesus kimtewa jiiix yu' nawa kwe'we'jme'.

**Galileasu Dxus yuwe's Jesus pta'sxni**

*(Lk 4.42-44)*

<sup>35</sup> Txã'wê yūuni khikhiiçte nee çxhi'dxtey, Jesusa' Dxus yakh puutx we'weya' u'kh çxhab ekaju. <sup>36</sup> Aça' Simona' vxite yakh Jesusna pakweya' u'kh. <sup>37</sup> Sa' uyçxa' pta'sxku:

—Jxukaysa idxa's jxpeejxta' jītewa, <sup>38</sup> Jesus pasçxa':

—Ay utxasuwe'sx vxitewa peejxta' Dxus yuwe ewsa's, aça' kxsū u'jwega. Txã'wê pta'sxna pekūjxa' íçxáath naa kiwete kīh jīk.

<sup>39</sup> Sa' eçx iiyamuçxa luuku vxit-satx nasaa ūusu kutxi'jna Galilea kiwesu jxuka pekūjk Dxus yuwe's pta'sxna, vxite' judiuwe'sx pkhaakhenisuwa.

**Teeçx piçthê'j wā'jy weete açã'sa's Jesus nuykatxhini**

*(Mt 8.1-4; Lk 5.12-16)*

<sup>40</sup> Txān ensu' teeçx piçthê'j wā'jy wee seena' kazxsate açã'sa Jesus tasxte peejxūkweçxa na'jīk:

—Adxa's nuykatxhiwá'ga ahçemeeçxa' jīna pxthaa we'wete', <sup>41</sup> Jesusa' peeygāhna kuseju jxa'dxçxa':

—Ahçeme'nja, naa pa'ga katxhiçxa mneeyūu jīçpkaçxha', <sup>42</sup> txāa wā'jy weeju katxhiçxak neeyūu.

<sup>43</sup> Txajū' Jesusa' txāa piçthê'ja's wala neewe'weçxa kaakh na'jīna:

<sup>44</sup> —Adx we'wenitxi' jxpā'yakççxa, maa yuhtxwa pta'sxmeene'ga, naasāa sacerdotexçxá's iidx kakwe's txwesya' me'j. Sa' txāa weeju

katxhipa'ga Dxusna peesune'ga Moises ma'wēga jxkaah txã'wēy, kxah nasa jxukaysa jiyutxna idx ew katxhiçxa neeyūtewa jīnak neewe'we. <sup>45</sup>Nawa txãa piçthē'ja' nasa jxukaysatx pta'sxku, Jesus ma'wē yūuni'swa jxuka. Txãa pa'gaçxáa Jesusa' maa çxhabte yuhwa áate pa'l'ya' ãjãmeeçxa', çxhab ekaju nasa meesuçxáak u'ju'. Makwe txã'wē yūtewa, txajx tasxte yu' majūwe'sxwa pa'l'na nestxi yu'.

**Esēya' ájasame's Jesus nuykatxhini**

(Mt 9.1-8; Lk 5.17-26)

**2** <sup>1</sup>Maz en skhēwniijū' Jesusa' ki'kin pa'kh Kapernaum çxhabte. Aça' nasa jiyutx Jesusa' pa'l'çxa teeçx yatte ūsa' jīni's. <sup>2</sup>Txãasatx naa dudte nasa wala pkhaakheçxa yat vxitxte jxuka uta, aça' Jesusa' Dxus yuwe's pta'sxku. <sup>3</sup>Naapkaçxha' pahz piçthē'jsa teeçx ēsēya' ájãsamee's yakhçxatx Jesus tasxte nuypa'l'. <sup>4</sup>Nawa nasaa ksxavxyte Jesus tasxte kuutxa'l'ya' ájãmeeçxa', yat kajkweju phaadeçxatx Jesus ūsnikhē nuykīh aadasga khikhçxa. <sup>5</sup>Txajū' açã'sa's nuypa'l'sawe'sxa' Jesusa' nuykatxhiyujuna sūhni's jiyuçxa', txãa açã'sa's we'wek Jesusa':

—Iidx pkala' peltunāyñi yā'l'jtx neeyūu jīte', <sup>6</sup>Dxus leya's kaapiya'l'sawe'sx wēsē'jna u'psa maaí yu' na'wētx yajkx:

<sup>7</sup>—¿Ma'wēçxaga naa piçthē'ja' txã'wē we'we'? Dxus yuuçxáa pkaltxi peltunāyya' ájawa'l'sa', aça' jweeju yu' ¿kimçxá' peltunāyya' ájama'k'? Aça' Dxusa's iweeçx we'wena ūsa' sūjū'tx. <sup>8</sup>Nawa Jesusa' txãawe'sx yaakxni's jiyuçxa na'l'jik:

—¿Kīh yuutekwe txã'wē yaaki'? <sup>9</sup>¿Maa thēyemesakx? Iidx pkala' peltunāyñi yā'l'jtx neeyūu ¿jīniá'? Meeçxa': Kiiteçxa iidx deeni's tu'sçxa me'l' ¿jīniá'? <sup>10</sup>Makwe thēysatewa Dxus Nçxi'k Nasa Yuusa' naa kiwete pkaltxi peltunāyya' ájawa'l'sa' naa pa'ga kaajiyu'l'ya'wath açxha'. Txajū' açã'sa's na'l'jik: <sup>11</sup>Idxa'sthu we'we': Kiiteçxa iidx deeni's tu'sçxa yatna me'l' jīçpkaçxha', <sup>12</sup>açã'sa' dudtey kiitena'wa txajx deeni's tu'sçxa u'kh, nasa thegna ūsiyna.

Txajū' jxukaysa wala kuh yajkxna Dxusna weçxana na'l'jī'tx:

—Bagaçx yuhwa na'wē yūuni yu's iuuymeetha'w jī'tx.

**Mateo's Jesus pa'yani**

(Mt 9.9-13; Lk 5.27-32)

<sup>13</sup>Txãa e'su' Jesusa' ki' u'kh íkh wala pukan. Aça' txajx tasxte nasa wala pkhaakhete', Dxus yuwe's kaapiya'kh. <sup>14</sup>Txãajū' ki' u'l'çxa', Alfxeo nçxi'k Levxia'sku uy, gobierno jīi vxyu pkhakhna u'pte. Sa':

—Adx yakh myuh jīna pa'yaçpkaçxha', Levxia' kiitena' Jesus yakh u'kh.

<sup>15</sup>Txajū' Jesusa' txãa yakh u'l'jusawe'sx yakh Levxi yatte ū'ya' u'kate', gobierno jīi vxyu pkhaksawe'sx vxite' pkalsawe'sxwa wala kuhsa

pkhaakheçxa' Jesus yakh mesate ũ'ya' kaçtxti. <sup>16</sup> Aça' Dxus leya's kaapiya'jsawe'sx vxite' fxariseowe'sxa' Jesusa' nasa txã'wësa ksxavxyte u'pte uyçxa', pëjxtxi Jesus yakh u'jusawe'sxtxi:

—I'kwe'sxtxi kaapiya'jsa çma'wëçxaga gobierno jii vxyu pkhaksawe'sx vxite' pkalsawe'sx yakh ũ'wë'? jite', <sup>17</sup>txã'wë pëyiçte Jesus wësê'jçxa' na'jik:

—Yu'çe'jsa's jxpeejxmeeta' aka ji'phmëe wët ũssa', naasáa açã'sa yuuçxáa yu'çe'jsa's jxpeejxta'. Adxa' naa kiwete nasa ewsatx pakweya' kîhmeeth, pkalsatx pakweya'çxáath kîh jik.

### **Yüunani's Jesusa's pëyni**

*(Mt 9.14-17; Lk 5.33-39)*

<sup>18</sup> Teeçx ente', Juan yakh u'jusa vxite' fxariseowe'sx yakh u'jusa txã'wë yüunaana ũste', nasa' paapëjxtxi Jesusa's:

—¿Juan yakh u'jusa vxite' fxariseowe'sx yakh u'jusawe'sxa' yüuna'tx, açã' idx yakh u'jusawe'sx yu' çkîh yuuçxata yüuna'çmëe? jite', <sup>19</sup> Jesusa' na'wëk kaaja'da'jna pas:

—¿Novxiowe'sx kaba ente pi'kxnisa' yüunaaya' äjãma'tx? novxio txãawe'sx yakh nee üsiite'. Kabani fxiesta pçumeyte', yüunaaya' äjãmeetxna. <sup>20</sup> Nawa novxio' txãawe'sx tasxu txuteewa'j en pa'jana, txãjü isa yüunaatxna.

<sup>21</sup> Ropa iisx suteniite, tela u'sesa yakh ya'pã'khe'çme'. Txã'wëme', tela u'sesa' jweefiçxáak sude' iisxsa's. <sup>22</sup> Txã'wëy beka u'se aahnisa's slun iisxsate ya'awu'çme'. Txã'wëme', beka u'sesa' slun iisxsa's sude'k, açã' beka yakh slun yakh e'zîi vxitu'tx. Txãa pa'ga beka u'sesa's slun u'sesate awwa'ja' jik.

### **Jxkaase entewa skuutxhtxi çxuktedeçxa ü'ni**

*(Mt 12.1-8; Lk 6.1-5)*

<sup>23</sup> Teeçx sapatu jxkaase ente', Jesusa' skuutxh ehsuk skhëw. Açã' txãa yakh u'jusawe'sxa' skuutxhtxi çxuktedeçxa ü'tx. <sup>24</sup> Açã' fxariseowe'sxa' na'wëtx pëjx:

—¿Uyu'gá' idx yakh u'jusawe'sxa' ma'wëçxata mjii en meetewa txã'wë yü'? jite', <sup>25</sup> Jesusa' na'wëk pas:

—I'kwe'sxa' Dxus libruete iilëeymeewá'kwe Davxida' çkîhga yuu? txãa yakh pi'kxna u'jusawe'sx yakh teeçx ente' wëeçxa'. <sup>26</sup> Sacerdote npiçthë'j Abiatar ente' dxuus yatte u'kaçxa, kxtee pantxi ü'k, sa' txãa yakh u'jusatxwa üsu'sku. Txãa pana' naasáa sacerdotewe'sxçxáa ü'wa'the jiiçxawa txã'wëk yüu.

<sup>27</sup> I'kwe'sxa' mjiyuwe: Jxkaase ena' nasatx selpiwa'jsa íiçxá', nawa suwwa'jsa yu' me'. <sup>28</sup> Txãa pa'ga Dxus Nçxi'k Nasa Yuusa' jxkaahwal' ji'pha' makwe sapatu jxkaase entewa jik.

### Teeçx piçthê'j txajx kuse udxnisa

(Mt 12.9-14; Lk 6.6-11)

**3** <sup>1</sup>Vxite sapatu ente! Jesusa' ki'kin judiuwe'sx pkhaakheni yatte u'kak. Aça' kxte! teeçx piçthê'j teeçx kuse udxnisa kēese'jya' ājāsameek u'p yu'. <sup>2</sup>Aça' fxariseowe'sxa' Jesusa's peethegu'natx ūsu!, sapatu jxkaase ente nuykatxhite' pāatxhī'khya' sūhçxa.

<sup>3</sup>Txajū' Jesusa' txāa piçthê'ja's pa'yaçxa nasaa pxāhte kxuujū'jçxa', <sup>4</sup>na'wēk paapējx vxite kxtee ūssatx:

—Sapatu jxkaase entewa pu'çxte çewmanx? meeçxa' çpu'çxwa'jmeemanx? Nasa's nwe'wete çewmanx? meeçxa' nwe'wemeete çewmanx? jīte!, txāawe'sxa' pasmée sxuuna'tx neeyūu.

<sup>5</sup>Txā'wē fxariseowe'sxa' Jesus we'weni's jxpa'gaya' wa'lte!, Jesusa' txāawe'sxtxi ūsçxa thegçxa na'jīnak we'we txāa piçthê'j kuse udxnisa's:

—Kuse's mku'le'j jīçpkaçxha', txajx kuse' ewuuk.

<sup>6</sup>Txajū' fxariseowe'sxa' Jesusa's ikhya' puutx we'weya' u'jtx Herodes ju'gsawe'sx yakh.

### Nasa wala kuh pehnatx īkh pukasu

<sup>7</sup>Naapkaçxha' Jesusa' txāa yakh u'jusawe'sx yakh u'kh īkh wala pukan. Aça' Galileaju nasa wala kuh u'jtx Jesus e'stey. <sup>8</sup>Txā'wē Jesus kījkihwa ew yūuni's nasa jiyuçxa', majūwe'sxwa Jesus tasxte pa'jtx thegya', Judeajuwe'sx, Jerusalenuwe'sx, Idumeajuwe'sx, Jordan yu'wala kutejuwe'sx, vxite' Tiro, Sidon çxhab peeku'juwe'sxwa. <sup>9-10</sup>Nasa txā'wē wala pa'the!, maazkuēe āçā'satxwa nuykatxhik, aça' jxukaysa Jesusa's kpaajxa'dxçxa katxhi wēesa txajx tasxteçxaçxáa utxaaçxa akaaçxpçxāhtx yuuna ūsu!. Txāa pa'gak Jesusa' txāa yakh u'jusawe'sxtxi jxkaah teeçx barko ih jī'phukahñ akaaçxhiçte kxtee khēewa'j. <sup>11</sup>Aça' eçx iiyamunisawe'sxa' Jesusa's uyçxa, txajx tasxte peejxūkwenā na'jīnatx we'we'!

—Idxa' Dxus Nçxi'kgu jīte!, <sup>12</sup>Jesusa' txāawe'sxtxi' wala juuna' we'wek kintewa āate kaajiyu'khamen.

### Doce nasa Jesus txhitxhni

(Mt 10.1-4; Lk 6.12-16)

<sup>13</sup>Txāa e'su' Jesusa' thā'the u'kh kuh nasatx pi'kççxa.

<sup>14</sup>Aça' kxtee kāhçxa', doce nasatx txhitxhku txāa yakh u'juwa'jsa, txāawe'sxtxi' Dxus yuwe's pta'sxya' kaajxa'. <sup>15</sup>Txā'wē txhitxhçxa', āçā'satxwa nuykatxhina eçx luuku vxit-satxwa ūusu kutxi'jya' ājāwa'ja's ūsku.

<sup>16</sup>Txāa doce nasa' na'wē yaasetā!: Simon, txā'sa' Pedro yasek ki'p. <sup>17</sup>Vxite' Zebedeo nçxi'kwe'sx pxakhsa Jakobo Juanwe'sxtxi yu!. Txāa

pxakhtxi' Boanerges jīnatx kxsuus'u, nasa juuna'sa pa'ga. <sup>18</sup>Vxite' Andrés, Fxelipe, Bartolomé, Mateo, Tomás, Alfexo nçxi'k Jakobo, Tadeo, vxite' Simón kananista nasa, <sup>19</sup>vxite' Judas Iskariote, Jesusa's açesawe'sx kusete dukhwa'jsa.

Jesusa' thā'ju sxawedçxa', teeçx yattek u'ka, txajx txhitxhnisawe'sx yakh.

### Dxus Espiritu's açewe'weni

(Mt 12.22-32; Lk 11.14-23; 12.10)

<sup>20</sup>Txā'wēy nasa iiméh wala kuh pkhaakhete', ū'walj en yuhwa ji'phumeeta'.

<sup>21</sup>Txajū' Jesus nwe'sxa' txā'wē yūuni's jiyuçxa', Jesusa' luuku yuune' sūhçxa pe'jna u'jya' pa'ltx. <sup>22</sup>Aça' Dxus leya's kaapiya'jsawe'sxwa Jerusalenu pa'lçxa' na'jī'tx:

—Naa piçthē'ja' eçxthē'ja's yuu ūuste ji'pha'. Txā'wēçxa'ík eçxtxi nasaa ūusuh kutxi'jya' ājā' jīte', <sup>23</sup>Jesusa' nasatx pa'yaçxa na'wēk pta'sx jiyukahn:

—¿Ma'wēçxa eçxthē'ja' eçxthē'ja's fiçxáa kutxi'jya' ājā'kx?

<sup>24</sup>Maa kiwetewa gobierno' peekx nasatx fiçxáa ahçeçxa puiiçxa', çxhāçxhameena. <sup>25</sup>Txā'wēy teeçx yattewe'sxwa puutx yahçena puiiçxa', pçuutxna puutx uuna. <sup>26</sup>Aça' txā'wēy eçxthē'jwa txajx jxkaahnisa eçx yakh fiçxáa puiiçxa', çxhāçxhamée puutx pçuutxna.

<sup>27</sup>Kim yuhwa ewteçxah yu' nkuusa'jya' ājāmeetxna, yat namu khuē'ya's tudmeeçxa yu'. Aça' txā'wē tudçxa yuuçxáa nkuusa'jya' ājātçna.

<sup>28</sup>I'kwe'sxa' mpa'yajkxwe: Nasa naa kiwete kīhwa ewmée yūuni kīhwa Dxusna ewmée nuywe'wetewa txāatxi' jxuka ya'peltunaína. <sup>29</sup>Nawa Dxus Espiritu's açewe'wete', bagaçxte yuhwa peltunāynimée yuuna, uu kiwen kaahwa'lçxáa nvxiituna jīk. <sup>30</sup>Nasa we'weçxa': Eçxthē'ja's ūuste ji'pha' jīpa'gak txā'wē pta'sx Jesusa'.

### Jesux njī'j vxite' txajx nyakhwe'sx

(Mt 12.46-50; Lk 8.19-21)

<sup>31</sup>Naapkaçxha' pa'ltx Jesus njī'j vxite' nyakhwe'sx jxuka. Sa' ekate kūhçxa, Jesusa's pa'yakaahxt. <sup>32</sup>Aça' Jesus yakh dxiite u'psa' pta'sxtxi na'jīna:

—Iidx mama iidx nyakhwe'sx pa'lçxa ekate ūsta', sa' idxa'stxi yuukaja' jīte', <sup>33</sup>Jesusa' na'wēk pas:

—¿Kimtxikwe adx mama adx nyakhwe'sx jīna we'wé'? <sup>34</sup>Sa' txā'wē pta'sxsatx theççxa' na'jīk:

—Adx mama adx nyakhwe'sxa' naata'. <sup>35</sup>Dxus jxkaahni's nwēese'jna kxtey yuusáa yuuçxáa, adx nyakh, adx npe'sx, adx mama na'wēsata' jīk.

### Skuutxh uuhsa's kaaja'da'jni

(Mt 13.1-9; Lk 8.4-8)

**4** <sup>1</sup>Jesusa' ki'kin i'kh wala pukate kaapiya'jya' kasehte', nasa iiméh wala kuh pkhaakheçxa utaaçte', Jesusa' barkote khēeççak pta'sx.

Aça' nasa yu' ìkh wala pukate neeyũutx wēsē'jna. <sup>2</sup>Txajū' kījīhwa pta'sxku ejemplo yakh kaaja'da'jna. Sa' na'wēk kaapiya'lj:

<sup>3</sup>—Mwēesē'ljwe: Skuutxh uuhsa' ujxa' kasejk. <sup>4</sup>Aça' mteefi yu' dxi'jsu āasu neeyũute!, vxiçxakwe ũ'tx. <sup>5</sup>Vxite ahsu' kwet kajkwesutx neeyũu kiwe peççxáa ji'phsu. Sa' kiwe jwetmée ya'fxihbçxa' dudtxi buçxa.

<sup>6</sup>Nawa sek açxaate' jxuka uhdxku, weçe dxiimeene' ji'phu' naa pa'ga.

<sup>7</sup>Vxite ahsu' çhũçh ksxavxysutx ũsxi, aça' çhũçh walaaçxa jxuka aphte', çutmeeta'. <sup>8</sup>Vxite ahsu' kiwe ewsatek ũsxi, sa' buçxaçxa wala ew çuttxi.

Maa tasxii yu' treinta, vxite! sesenta, vxite! cien nxinxtxi çut.

<sup>9</sup>Na'wē pta'sxthu txā'sa' jiyuwa'jsa ũsçxa', jiyune'kwe jīk.

<sup>10</sup>Txajū' nasa kuhsa yu' u'the, Jesusçxáak neeyũu, doce txhitxhnisawe'sx vxite nasa yakh. Aça' txāawe'sxa' paapējxtxi txāa ejemplo's ma'jinitewa jiyuya'. <sup>11</sup>Aça' Jesusa' pta'sxku:

—Dxus jxkaahni ensu ma'wē yũuwa'ja'swa kim yuhwa jiyunimeesa's i'kwe'sx yuutxi's kaajiyu'jwa'ja'. Nawa jiyuwa'jmeesatxi's ejemplo yakhçxáa pta'sxwa'ja', <sup>12</sup>kxah uyçxawa, uysamée na'wēçxáa neeyũutxna, sa' wēsē'ljçxawa, wēsē'ljsamée na'wēçxáa neeyũuçxa Dxus tasxte sxawedmeetxna, aça' txāawe'sxtxi' Dxusa' peltunaimeena.

<sup>13</sup>Txajū' na'wēk āate kaajiyu'lj:

—I'kwe'sxa' naa ejemplo's jiyu'çmeewá'kwe. Txā'wēçxa' çma'wē vxite ejemplotxwa jiyuki'kwe? <sup>14</sup>Skuutxh uuhsa' Dxus yuwe's pta'sxsa na'wēsa'. <sup>15</sup>Maa nasaii yu' skuutxh fxiw dxi'jsu ũsxisáa na'wēsata!: Dxus yuwe's wēsē'ljçxa ũuste jxpa'gatewa, eçxthē'lj pa'ljçxa txāa yuwe's ũusu kutxi'jina. <sup>16</sup>Vxite nasa' skuutxh fxiw kwet kajkwesu ũsxisáa na'wēsata!: Dxus yuwe's açxhii yu' weçxanatx jxpa'ga'.

<sup>17</sup>Nawa ũusuh jxuka yajkçxça jxpa'gameeçxa', Dxus yuwe's ahççça pkxuwa'lj en pa'theçxáa txaçxmeyna wete'tx. <sup>18</sup>Aça' vxite nasa' skuutxh fxiw çhũçh ksxavxysu ũsxisáa na'wēsata!: txāawe'sxa' Dxus yuwe's wēsē'thewa, <sup>19</sup>naa kiwete kījīhwa ji'phu wēenisaçxáa ũuste jxuka khēeçxa Dxus yuwe yu'sa' kaapeçxkana'jna.

<sup>20</sup>Nawa maa nasaii yu' skuutxh fxiw kiwe ewsate ũsxiçxa ma'wēta maaii yu' treinta, vxite! sesenta vxite! cien nxinx pehna, txā'wē Dxus yuwe ũuste penawa'jsa'!

### Āate jiyuwa'lj yu' neeyũuwa'jsamée

(Lk 8.16-18)

<sup>21</sup>Txajū' vxite ejemplo na'wēk pta'sx:

—Lampara's pki'taçxa çkaja dxiite meeçxa' atũu dxiite sũthnisatxná'? Txā'wē yũumée, lampara's āatek ya'txaja', eena' kweethkahn. <sup>22</sup>Makwe sũttewa, uynimée yu' kīh yuhwa neeyũumeena. Sa' txā'wēy makwe ũusteçxáa yaakxnisa'swa jiyunimée yu' neeyũumeena. <sup>23</sup>Jiyuwa'jsa ũsçxa', jxpa'yakx mwēesē'ljwe jīçxa', <sup>24</sup>na'wēk pta'sx:

—Adx kaapiya'jni's jxpa'yakx mwēesē'ljwe. I'kwe'sx wa'lmée wēsē'the', Dxusa' jxthaakwe kaajiyu'jna. <sup>25</sup>Dxus yuwe's jiyuwa'jsa's kaajiyu'jni yuuna. Nawa Dxus yuwe's jiyuwa'jmeesa's kaajiyu'jnimée yuuna jīk.

### Dxus naa kiwete jxkaajxa' pa'jnisa

<sup>26</sup>Jesusa' vxite ejemplo pta'sxku:

—Dxus naa kiwete jxkaajxa' pa'jnisa' na'wēsa': Teeçx piçthē'j mjīisa' fxiwa's kiwete uhçxaçxáa <sup>27</sup>u'ljwe'k sa' txaçxku theyya' pa'jaçmée. Aça' uuhnisa' buçxaçxa wala'k, nawa uuhsa' yu' jiimeek yu' ma'wē buçxana walaaçtewa. <sup>28</sup>Fxiwa' kiwete ujxā'the', peekxçxáa buçxa'k kīhwa yuumeetewa, nyafxte' tasx khuē'y wala'k, txā'wē yuuçxak spiiga kaseje', txāa e'su'k nxinx kaseje', <sup>29</sup>aça' thē'j ente', pkhakhya' kaseje'tx.

### Mostasa fxiwa's kaaja'da'jnisa

(Mt 13.31-32; Lk 13.18-19)

<sup>30</sup>Vxite ejemplo pta'sx Jesusa':

—Dxus naa kiwete jxkaajxa' takhnisa's çkīh yakh kaaja'da'ja'kxtha'w aç jiyuki'kwe? <sup>31</sup>Mostasa fxiw na'wēsa' aç' txāa yakh kaaja'da'ja'nja'w.

Txāa fxiwa' maa maa fxiwtewa thaakwe musekuēta', <sup>32</sup>nawa kiwete ujxā'the', maa ējxā tasxtewa jxthaakwek waláa, seena' wala çxhā'px kasehna. Aça' vxiçxakwe yuhwa txāa ējxā ksxavxysu yaat-ya' ājā'tx. Naa kiwete Dxus jxkaajxa' takhnisa' txā'wēysa'.

### Ejemplo yakh kaapiya'jwa'ja's pta'sxni

(Mt 13.34-35)

<sup>33</sup>Jesusa' Dxus yuwe's txā'wēk pta'sxi' wala kuh ejemplo kutxi'jna, jiyuwa'jsa' jiyuya' ājākahn. <sup>34</sup>Ejemplo ji'phmée yu' kaapiya'ja'çme'. Nawa txāa yakh u'jusawe'sx yuutxi's kīh ejemplo'swa jxuka khiyu'jçxak nvxiitu'.

### Marte wejxa wala's Jesus kxuujju'jni

(Mt 8.23-27; Lk 8.22-25)

<sup>35</sup>Txāa entey çxhi'dxna kījaçte', Jesusa' na'ljik txāa yakh u'jusawe'sxtxi':

—U'ljwega' ìkh wala kuteñ jīte', <sup>36</sup>nasatx nvxihtna' Jesusa's pe'jna u'jtx txāawe'sx khēeçxa u'pni barkote. Aça' vxite barkowa ihtey u'jtx.

<sup>37</sup>Ìkh wala pxājūy u'ljweçpkaçxha', wejxaa wala kiiteçxa barko's ìkh dxiikhē akhya'wak yu', yu'a's barkote yuutaçxa. <sup>38</sup>Naapkaçxha' Jesusa' deenik yu', barko e'ste kaçxçxa dxikthe's peedxikiga khikhçxa. Aça' txāa yakh u'jusawe'sxa' Jesusa's fxīttxxi na'ljīna:

—Ìkh dxiikhē khējeçtha'w aç' çkwe'sxtxi' peeygāja'çmeega'? jīte', <sup>39</sup>Jesusa' kiiteçxa, wejxa's we'wek yujukahn petx ìkh yā'jçxa. Naapkaçxha' wejxa yujute', ìkhwa yujuk.

<sup>40</sup>Txajū' Jesusa' txāa yakh u'jusawe'sxtxi' na'ljik: çKīh yuuçxakwe Dxus yu's yajkxmée txakwe wala ùukhú'? jik.

<sup>41</sup>Txā'wē wejxa yuhwa nwēese'the', txāawe'sxa' wala kuh yajkxna neeyūutx na'ljīna:

—Naa piçthê'ja' çkim yujkx, açki'tx wejxa îkh txâ'wêsa yuhwa nwêesê'jé'? jî'tx.

**Gadara kiwetewe'sx eçx iiyamunisa**  
(Mt 8.28-34; Lk 8.26-39)

**5** <sup>1</sup>Txajû' îkh wala kute Gadara kiwete pa'ljtx. <sup>2</sup>Aça' Jesus barkoju kasejeçpkaçxha', teeçx piçthê'j eçx iiyamunisa uusáa pedani kafxu kasehçxa Jesus tasxte utxaak. <sup>3</sup>Txâa piçthê'ja' uusáa pedani kafxsuk u'psa yu', aça' txâ'sa' kim yuhwa çam kadenaju tudçxa jxpe'lja' äjä'çmeeta'. <sup>4</sup>Çxida petx kuse yäl'jçxa maazkuêe uswa tudtewa, nuywejiméek çxuktedeçxa püsxi'. Aça' kim yuhwa äjä'çmeeta' tudçxa jxpe'lja' yu'. <sup>5</sup>En ma'k yuu kus ma'k yuu nawa vxîçsu vxite' uusáa pedani kafxsu weynak pekûjû' kwet-su kpä'yuuna. <sup>6</sup>Nawa Jesusa's jxu'the uyçxa', wuwuuna u'l'jçxa txajx tasxte peejxûkwek <sup>7</sup>sus we'wena:

—¿Adxa's kîh yûuya'waga? Jesus, Dxus îtxîsa Nçxi'k. Dxus pa'ga adxa's peeygâhçxa txakwe seena' wala nxuste yu' kaahnu jîk. <sup>8</sup>Jesusa' eçx luuku vxit-sa's we'weçxa': Naa piçthê'j ûusu mkaaseh jîpa'gak txâ'jî'.

<sup>9</sup>Txajû' Jesusa' pëjxku:

—¿Kîh yaasega? jîte', pta'sxku:

—Legion yaaseth, wala kuhtha'w naa pa'ga jîk. <sup>10</sup>Sa' txâa eçx luuku vxit-sa' wala pxthaa we'wek txâa kiwejû kutxi'khamen.

<sup>11</sup>Txajû' kxsû vxîç ja'dasû wala kuçxi ûsu'tx aphna. <sup>12</sup>Aça' eçx luuku vxit-sa' na'ljinatx pxthaa we'we:

—Kuçxi ûuste khêeya' u'l'khan kwe'sxtxi mkaah jîte', <sup>13</sup>Jesusa' txâa eçx luuku vxit-satx kuçxi ûuste u'kaya' kaakh.

Txajû' txâa eçx luuku vxit-sa kuçxi ûuste khêete', kuçxi' luuku yuuçxa penxakhê peluçxa yu'teçxaçxâa khêeçxa jxuka uutx. Txâa kuçxi' dos mil âhtx yu'!

<sup>14</sup>Txâ'wê yûute', kuçxi thegsa ûukhçxa wala dud pta'sxya' u'ljtx çxhabsu vxite' çxhab ekaju jxuka. Aça' nasa' wala pa'ljtx thegya', kîh yûutewa uyya'. <sup>15</sup>Sa' Jesus ûsnite pa'l'jçxa uytxi txâa piçthê'j eçx luuku vxitnisa' wêt yäl'j ropa jî'ph u'pte. Txâ'wê uyçxa wala ûukhtxi.

<sup>16</sup>Txajû' ma'wê yûuçxa eçx luuku vxitnisa katxhini vxite' kîh yûuçxa kuçxi uuni'swa uysaawe'sxa' jxuka pta'sxtxi nasa thegya' pa'ljsatxi's. <sup>17</sup>Txajû' nasa' Jesusa's ûusçxa we'wetx txâawe'sx kiwejû u'l'khan.

<sup>18</sup>Aça' Jesusa' ki' sxawedxa' barkote khêjeçpkaçxha', eçx luuku vxitnijû katxhisa' wala pxthaa we'wek pe'l'jçxa u'l'khan. <sup>19</sup>Nawa Jesusa' pe'l'jna u'ljmée na'wêk jxkaah:

—Iidx yatna me'l, sa' iidx nwe'sxtxi pta'sxine'ga idxa's Dxus peeygâhçxa ma'wê ew yûuni'swa.

<sup>20</sup>Txajû' txâa piçthê'ja' u'l'jçxa, Dekapolis çxhabsu jxuka pta'sxku Jesus ma'wê yûuçxa nuykatxhini'swa. Aça' nasa' wala kuh yaaki'tx jxukaysa.

**Jairo niisa vxite' Jesus atxhte jxa'dxsa**  
(Mt 9.18-26; Lk 8.40-56)

21 Txajü' Jesusa' ìkh wala kutejü barkote khêeçxa pesahçxa kxtee üste', nasa wala pa'ljtx txajx üsnite. 22 Aça' judiuwe'sx pkhaakhenite npiičthē'jsa Jairo yaasesa' Jesus tasxte peejxūkweçxa 23 na'wêk pxthaa we'we:

—Adx niisakuē' uuçyā'ja', aça' uukahmén myuh jxa'dxya' iidx kuseju jite', 24 txāa yakh u'kh Jesusa'. Aça' nasa iiméh wala pehnaçxa, dxi'the zuuna'çxáatx u'jweç yu'. 25 Aça' txāa nasa ksxavxyte teeçx u'y kakwe yu' vxyaate doce anxuyā'j açā'na u'jusak kaseh. 26 Sa' txāa açā'sa' wala pxthaa yuusa yu'k yu'çe'jsatx paapëjxna. Sa' makwe yu'çe weyna txajx ji'phuni jxuka pçuutewa, kīh yuhwa yu'çe yuumée jweefiçxáak jxthaakwena u'jweç yu'.

27 Txajü' txāa u'ya' Jesus kīh yūusaatewa jiyuçxa' paaçte e'su kūhçxa, kpaajxa'dxku txajx atxhkhē. 28 Txā'wē Jesus atxhkhē kpaajxa'dxçxaçxāa katxhi'nja sūhçxak txā'wē yūu. 29 Sa' txā'wē jxa'dxiçpkaçxha', kakwe yu' vxyaame', aça' txāa dudtey txajx kakwete wēt yā'kh yajkx.

30 Txajü' Jesusa' teeçx açā'sa' txajx atxhkhē jxa'dxçxa katxhini's jiyuk, sa' nasaa ksxavxyte u'jweçíi yu'thegçxa', na'jīk:

—¿Kimga adx atxhkhē jxa'dx? jite', 31 Pedrowe'sxa' na'wētx pas:

—Nasaa ksxavxyte zuuna'çxāa u'jweçgu sa' ¿ma'wēga kimga jxa'dx jīna we'wé'? jitewa, 32 Jesusa' nasaa ksxavxysu thegu'gku kim jxa'dxtewa uyya'.

33 Txajü' txāa u'ya' txā'wē naa dudte ew katxhini's īsxiimée pta'sxna ūukhna Jesus tasxte yayan kūhçxa peejxūkwek. 34 Aça' Jesusa' na'wêk we'we:

—I'kwe' ūusuh jxuka yajkxçxane'kwe katxhiya' sūhçxa adx tasxte utxāa, txāa pa'ga katxhini i'kwe neeyūu. Açxha' açā'mée wēt me'jwe weçxana jīk.

35 Jesusa' txā'wē we'wena nee ūsiyna, Jairo yatu yuusa kūhçxa' Jairo's pta'sxtxi:

—Iidx niisakuē' uuyā'kh, aça' kuçx pa'pçxunu kaapiya'jsa's pe'jna u'jya' jite', 36 Jesusa' wēsē'jçxa, Jairo's kvxiisxa'kh na'jīna:

—Nxusnu. Adx ewuwa'ja'sçxāa myajkx jīçxa', 37 Jesusa' vxite yuutxi's pe'jmée, pxakhsa Jakobo Juan vxite' Pedro txāawe'sxçxáatxku pe'jçxa u'j. 38 Sa' Jairo yatte pa'jçxa', uyku nasa wala ū'nena ūste. 39 Sa' dxiite u'kaçxa we'wek:

—¿Kījxa'kwe txakwe wala ū'né'? Luuçxa' uunime', Ī'neeçxāa deeni' jite', 40 nasa' Jesusa's npeevxysxijkatx. Aça' Jesusa' nasatx jxuka eka kutxi'jçxa, txāa luuçx neywe'sx vxite' txāa yakh yuusa tekhsa txāawe'sx yakh uusāa ūsnite utxaaçxa, 41 kuseju pu'kisçxa na'wêk we'we:

—Talita kumi—txā' na'jīni': Ijçxa'sthu we'we' mkiiteçx jīni'.

42 Txā'jīçpkaçxha' txāa uusá' kiiteçxa u'juya' ājāk. Aça' Jesus txā'wē

uusá's ki' ãtxĩ vxitte uyçxa', wala kuh yajkxtxi. <sup>43</sup>Txajũ' Jesusa' wala neewe'wek maa yuhtxwa pta'sxkahnén, sa' txãa luuçxa's puuçkaakh. Txãa luuçxa' doce anxu ji'phsak yu'.

**Jesusa' Nasaretna u'jni**  
(Mt 13.53-58; Lk 4.16-30)

**6** <sup>1</sup>Jesusa' txãa çxhabu kasehçxa', txajx u'pni çxhab Nasaretnak sxawedna u'j txãa yakh u'jusawe'sx yakh. <sup>2</sup>Sa' sapatu jxkaase ente' judiuwe'sx pkhaakhenitek kaapiya'jna ũsu', açã' nasa jxukaysa wësê'jçxa', kuh yajkxna na'jĩtx:

—Naa piçthê'ja' çmteega txakwe wala kĩjxa'wa piya? çKim kaapiya'theki'k txakwe wala kĩjkĩh yũuya'wa ãjã'? <sup>3</sup>Naãĩ kwe'sx jiyunisa karpintero' Maria nçxi'k. Sa' txajx nyakhtxiwa jiitha'w, Jakobo, Jose, Judas, Simon txãawe'sxta'. Açã' txajx npe'sxwe'sxwa naa çxhabtey u'pta'. Txã'wê kwe'sx jiyunisa' jĩçxatx Jesus kaapiya'jni's nwëesê'jya' wa'l.

<sup>4</sup>Txajũ' Jesusa' na'wêk we'we txãa nasatx:

—Mteewe'sxwa Dxus yuwe pta'sxsa yu'sa' wa'lmeetx jxpa'ga'. Nawa peekx kiwetewe'sx yu' jxpa'ga'çmeeta' vxite' peekx nwe'sx, peekx yattewe'sx.

<sup>5</sup>Txã'jçxa' kxteea' mazkuêçxãa nuykatxhĩçxaçxãa jwee yu' kĩhwa yũume'.

<sup>6</sup>Sa' Jesusa' nxusnak neeyũu, txã'wê txajx kiwetewe'sx nwëesê'jmeete.

Txajũ' Jesusa' vxite çxhabsuk pta'sxya' kaseh.

**Docesatx Dxus yuwe's pta'sxya' kaahni**  
(Mt 10.5-15; Lk 9.1-6)

<sup>7</sup>Sa' txãa yakh u'jusa docesatx pa'yaçxa', eçx luuku vxit-satx nasa ũusu kutxi'jya' ãjãwa'ja's ũççxa', e'z e'zku kaah. <sup>8</sup>Nawa khãabuçxã's atçxa kĩh yuhwa tu'smêek u'khaah, ya'ja, vxyu, kaame txã'wësatsx. <sup>9</sup>Sa' pelgatxiçxãa paatçxa teeçx kmiisa yakhçxãak u'khaah. <sup>10</sup>Sa' na'wê yũuwa'ja'sku pta'sx: Maa yatte paadejxa' pa'jyã'jçxa', kxteeçxãa paadehna ũsune'kwe txajũ ki' kasehna u'phkaçx. <sup>11</sup>Sa' mteefi yu' i'kwe'sx pta'sxni's wësê'j wëemeeçxa yat pki'jmeete', txãajũ kasejene'kwe i'kwe'sx çxidate kiwe tuhda's sakweekweçxa, kxah yuuwesa yuutxna. Isath we'we': Dxus kastigãywa'j en ãhte', txãawe'sxa' Sodoma Gomoçxa çxhabtewe'sxte jxthaakwe kastigo's knayuutxna txã'wê i'kwe'sxtxi jxpa'gaya' wa'lpa'ga.

<sup>12</sup>Txã'wê Jesus jxkaahte', txãawe'sxa' kasehtx Dxus yuwe's pta'sxna, pkaltxi nvxihtçxa Dxus tasxte misxawedwe jĩna. <sup>13</sup>Sa' eçx luuku vxit-satxwa nasa ũusu kutxi'jna maazkuêe ãçã'satxwa aceite dxikthehê awna nuykatxhitx.

**Juan Bautista uunĩ**  
(Mt 14.1-12; Lk 9.7-9)

<sup>14</sup>Txã'wê Jesus kĩjkĩhwa ew yũuni's ne'jwe'sx Herodes jiyuçxa':

—Juan Bautistane' uuçxawa ki' itxĩ yuu, txãasane' kījkih yūuya'wa ājā' jīte', <sup>15</sup>vxite nasa we'weçxa':

—Naa piçthē'ja' Dxus yuwe pta'sxsa Eliasna jī'tx. Naapkaçxha' vxite we'weçxa':

—Txāniiteywa ma'wēta Dxus yuwe pta'sxsa kaseje', txā'wēysana jīnatx ūsu'. <sup>16</sup>Nasa txā'wē we'wete', Herodeswa we'weçxa':

—Juan Bautista txhikha's na'wē kaaspē'the'th txāane' ki' itxĩ yuuçxa kiite jīk.

<sup>17</sup>Herodesa' Juana's na'wē yuuçxaga kiikhe'j: Herodesa' Juana's kadenaju tudçxa karcelte ktxaaja'khu'ga, Herodias ahççxa ewmēe yuwe ūspa'ga. Txāa Herodiasa' Fxeliye nyuuk yu', aça' Fxeliye yu' Herodes nyakhīçxāak yu'. Nawa Herodesa' Fxeliye nyu Herodiasa's kusa'jçxa txajx nyu na'wēk jxpe'j. <sup>18</sup>Txāa pa'ga ku'ga Juana' Herodesa's na'jīna yu'kxpeh: Iidx yakthē'j nyu's kusa'jçxa' iidx nyu na'wē jxpe'jni' ewme' jīni's <sup>19</sup>Herodias jiyuçxa', Juana's ahççxa ikh wēçxawa ājā'çmeeku'ga. <sup>20</sup>Juana's Herodias ikhya' ājākahmén, Herodesa' karcelteku'ga ktxaaja'j nwe'wena. Juana' Dxus dxi'pte kīhte yuhwa jxpubamēe wala ew fxi'zesatewa Herodesa' jīine' yu', txāasane' ūukhçxa nwe'we, sa' Juan pta'sxni's Herodesa' kxtey yuuçmeeçxawa wa'lmeeku'ga weçxana wēsē'je'.

<sup>21</sup>Herodesa' txajx upxni en anxu āa iisak fxiesta vxitu'. Txāasak teeçx ente' fxiesta ki'p txajx jxkaahni npiçthē'jsa vxite' Galileate jxtuhthesatx pi'kxçxa. Txāa fxiestatene' Herodiasa' Juana's ewmēe yūuwa'ja's uy.

<sup>22</sup>Txajū' Herodias niisa' txāa fxiestate pa'jçxa' wala zhiçxkwe ku'jne' pi'kxnasa dxi'pte. Aça' ne'jwe'sx Herodes uyçxa' na'jīku'ga txāa kna'sa's:

—Ijçxa kīh pējxtewa, adxa' ūsu'nja. <sup>23</sup>Dxus uyte, içxa pēyni's kīhnawa ūsuçxā'nja, meeçxa' adx jxkaahna ūsni kiwe's pējxyuhtewa pxāhn txuhdeçxa ūsu'nja jīte', <sup>24</sup>txāa kna'sa' kasehna u'jçxa, txajx nji'ja'sku'ga paapējx:

—;Kīh pēyi'ki'th? jīna. Aça' nji'j pasçxa':

—Juan Bautista dxikthea's mpēyçxi jīnaku'ga jxkaah. <sup>25</sup>Txajū' txāa kna'sa' Herodes tasxte ki' kūhçxa':

—Āçxhī Juan Bautista dxikthea's plaatute akhçxa mah jīte', <sup>26</sup>ne'jwe'sx Herodesa': Kīh pējxtewa ūsu'nja jīna nasaa dxi'pte jurāyyā'jçxa', īsxīya' ājāmeeku'ga. <sup>27</sup>Txajū' Herodesa' dudtey teeçx soldau's kaakhu'ga Juan dxikthea's nikxya'. <sup>28</sup>Aça' txāa soldau' karcelna u'jçxa', Juan txhikha's spē'thçxa, plaatute akhçxa jxūna kūjku'ga txāa kna'sa's ūsya'. Aça' txāa yu' jxpa'gaçxa', txajx nji'ja'sku'ga dukh. <sup>29</sup>Txā'wē yūute', Juan yakh u'jusawe'sx jiyuçxa', txāa uuni kakwe's kiisçxa pedaaku'ta. Txā'wē yūuni'sne' Herodesa' yajkx.

### Cinko mil nasatx Jesus sājīni

(Mt 14.13-21; Lk 9.10-17; Jn 6.1-14)

<sup>30</sup>Txā'wē e'z e'z jxkaahnisawe'sxa' Jesus tasxte ki' sxawedna pa'jçxa', txāawe'sx ma'wē kaapiya'jna kīhçxa yūuçxawa Jesusa's jxuka pta'sxtxi.

31 Txã'wê nasa txakwe wala pa'jna ũste', txãawe'sxa' ũ'wa'j en yuhwa uyméetx fxi'zena ũsu'. Txãa pa'gak Jesus we'weçxa':

—Mejkawe, dudte jxkaaseya' nasaa yatmeesu ji'.

32 Txajü' Jesusa' txãa yakh u'jusawe'sxçxáatx pe'jçxa, barkote khêeçxa u'kh, nasaa yatmeesu pa'jçxa jxkaaseya'. 33 Txã'wê Jesus u'jweçte nasa wala uyçxa', mtee pa'jya' u'jweçtewa jiyutx. Txãasatx txãawe'sx khuê'y yaçte pa'j Jesus pa'jwa'the maa çxhabuwe'sxwa wuwuuçxáa u'jçxa.

34 Aça' Jesus barkoju kasejççxa', uyku nasa wala kuh pkhaakhena ũste. Sa' txãawe'sxtxi's peeygãjk txã'wê piixsáa namu ji'phmeesa na'wê txãawe'sxçxáa ũste. Txajü' Dxus yuwe's wala kaapiya'kh.

35 Kxtee kaapiya'jna ũsiyna kusuçte', txãa yakh u'jusawe'sxa' txajx tasxte utxaaçxa na'wêtx we'we:

—Aysu nasaa yatmeete ũsiyna, kusuçá'. 36 Aça' nasatxi' mkaah, kxah yat-su meeçxawa çxhabkuê utxasu ũsta' kxsü pa'jçxa ũ'wa'j weyuutxna. Txã'wême' ayte' kíhwa ji'phmeeta' jíte', 37 Jesus pasçxa':

—I'kwe'sx mpuuçwe jínak jxkaah.

Aça' txãawe'sxa' na'wêtx pas:

—Kwe'sxa' doscientos peso pan weyya' u'jçxa puuçuwá'nja'w jíte',

38 Jesusa' pějxku:

—¿Maz pan ji'phkwe? Me'jwe thegya' jína.

Aça' pan uyçxa', pta'sxtxi:

—Tahç pan, e'z wedxçxáatha'w uy jína.

39 Txajü' Jesusa' nasatxi' txaksü kaçxkaakh fxiifxii txuteeçxa. 40 Aça' cien ãh vxite' cinkwenta kxaztxi fxiifxii txuteeçxa kaçx. 41 Naapkaçxha' Jesusa' tahç pan e'z wedxtxi uweçxa, cielute pagayçxa Dxusa's weçxana'wa pantxi pe'lteedeçxa txãa yakh u'jusawe'sxtxi' ũsku, nasatx jxuka ũsu'skahn. Sa' wedxtxiwa txã'wëyku ũsu's jxukaysatx. 42 Txã'wê yũute', jxukaysa ũ'çxa txiktxi neeyũu. 43 Txajü' txãa pan vxite' wedx pe'ltedenisa neeyũute' pkhakhçxa', doce kanastate utatx pkhakh. 44 Aça' nasa yu' piçthê'jçxáatx isani cinko mil áhtx yu'.

### Íkh kajkwega Jesus u'juni

(Mt 14.22-27; Jn 6.16-21)

45 Txajü' Jesusa' txãa yakh u'jusawe'sxtxi barkote kaateka'jçxa yaçte kaakh Beçaidan. Txã'wê yũuçxa' txãa yu' kxtee neeyũuk nasa txuteena u'jsatx weçxana. 46 Sa' nasa jxuka txuteena u'jweçpkaçxha', Dxus yakh puutx we'weya' u'kh thã'the.

47 Jxuka çxhi'dxna jxã'jaçte', barko' íkh pxäjüy u'jweçku yu', Nawa Jesus yu', íkh kutetee ũsíçxáak yu'. 48 Sa' khikhyna sêjeçte', Jesusa' uyku Beçaidan u'jsawe'sxtxi's wejxa yupte, barko's kaajxa' çxhãçxhamée íkhsu u'jute.

Txajü', Jesusa' txãawe'sxtxi' kpajkxya' íkhsu u'jçxa, txãawe'sx pukasu utxa sêhçxa, barko's phyahçna skhëuuçku yu'. 49 Aça' barkote u'jsawe'sxa'

txã'wẽ ìkhsu ul'jweçte uyçxa', eçxa'stha'w uy sũhçxa sustxi pebée.

<sup>50</sup>Txã'sa' jxukaysatx uyçxa ùukh. Naapkaçxa' Jesusa' we'wek:

—Ûukhnuwe. Adxthu jĩna.

<sup>51</sup>Txajũ' Jesusa' barkote khẽjeçpkaçxa', wejxa' yujuk. Aça' txãawe'sxa' iiméh wala ùukh yajkxna kuh we'wenatx neeyũ. <sup>52</sup>Txã'wẽ Dxus Nçxi'kçxa kijxa'wa ãjãwa'jsaçxak kuhmée pan yakh nasa txaaazkuéesatx sã'jĩ' sũhwa'l'j yu'sa' ji'phmeene'ta yu', txãasatx txakwe wala kuh yajkxna neeyũ.

### Genesarettewe'sxtxi Jesus nuycatxhini

(Mt 14.34-36)

<sup>53</sup>Txajũ' Genesaret kiwete pesahçxa', barko's ìkh pukatetx tudçxa txah. <sup>54</sup>Aça' barkoju sa'jaçpkaçxa', txãa kiwesuwe'sx nasa' jiyutx Jesus pa'jni's. <sup>55</sup>Sa' txãa kiwesu açã'satx jxuka pkhakhçxa yakhna pa'jtx Jesus mtee ùstewa. <sup>56</sup>Txajũ' Jesusa' çxhabna ma'k ul', meeçxa' yat-su ma'k pa'jya' ul', meeçxa' dxi'the ma'k ul'jweç yuu nawa txajx skhẽwwa'jsutx açã'satx khikhe'. Txã'wẽ yũuçxatx skhẽuuçte' wala pxthaa we'we', txajx atxh vxiçteçxáawa açã'satx khya'dxi'khan. Aça' maawa txajx atxh vxiçteçxáawa jxa'dxsa', jxuka katxhiçxatx neeyũ'.

### Nasa's ewmée vxite-sa

(Mt 15.1-20)

**7** <sup>1</sup>Txajũ' fxariseowe'sx vxite' Dxus leya's kaapiya'jsawe'sxwa Jerusalenu pa'lçxa Jesus tasxte utxaatx thegya'. <sup>2</sup>Aça' Jesus yakh ul'jusawe'sxa' kusekhẽ' yu' kaahmée ù'weçte uyçxa', açewe'wetx fxariseowe'sxa'.

<sup>3</sup>(Yaçgawe'sx ma'wẽ jxkaathe' Judiuwe'sxa' jxukaysa na'wẽ kuh jwed yũuwa'ja'stxi nwéesẽ'jẽ' ewmeesa pëethekahmén jĩçxa: <sup>4</sup>Merkaujũ pa'lçxa', kusekhẽ yu' kaahwa'ja' jĩ'tx. Sa' waso, mitxh, kĩhwa iijxũni çam yuutxi' jxuka kajkwekhẽ yu' kaahçxa iijxũwa'ja' jĩnatx kaapiya'ja'.)

<sup>5</sup>Txãasatx fxariseowe'sx vxite' Dxus leya's kaapiya'jsawe'sxa' na'ljĩna Jesusa's pẽjx:

—Idx yakh ul'jusawe'sxa' çkĩh yũuçxata yaçgawe'sx kaapiya'jnitxi' kxtey yu'çmée, kusekhẽ yu' kaahmée ù'wé'? jite', <sup>6</sup>Jesusa' na'wẽk pas:

—I'kwe'sxa' yuwejuçxáa ew we'weçxa', ùuste yu' ewméeçxáa yaakxsai'kwe aça' Isaiasa' isa yuh Dxus we'weni's na'ljĩna fxi'ljne':

Naa nasa' yuweju yu' adxa's yaaki'tha'w jĩçxawa,  
Ûusuh yu' adxa's yaaki'çmeeta'.

<sup>7</sup>Naa kiwete nasaa kaapiya'jniçxá's kxtey yuuna ùsçxa,

Txã'wẽ Dxus jxkaahni'stha'w kxtey yu' jite', kxul yuhna jĩna Dxus we'weni'sku fxi'l'j Isaiasa'.

<sup>8</sup>I'kwe'sxa' Dxus jxkaahni yu'sa' nvxihtçxa, naa kiwega nasaa kaapiya'jniçxá's i'kwe nwéesẽ'ljna wala ew ki'su' na'wẽ yũuna: waso, mitxh, kĩjkĩhtxwa txã'wẽ i'kwe ki'su' yu' kaahna.

<sup>9</sup>Na'jĩ'th na': i'kwe'sxa' naa kiwega nasaa kaapiya'jniçxá's nwēesē'jna ki'sçxa', Dxus jxkaahni yu'sa' nvxihti'kwe. <sup>10</sup>I'kwe'sx na'wē yūuni's myajxwe wakk: Moisesa' na'jĩnak fxi'lj: Iidx tata iidx mama txāawe'sxtxi' peeygāhna pu'çxwa'ja' jĩ'k. Aça' txā'wē yūumée, neywe'sxtxi açewe'wesa' uu ena's jil'phuna jĩ'k. <sup>11-13</sup>I'kwe'sx yaçgawe'sxa' na'wētx kaapiya'ja': Maa nasawa neywe'sxtxi peeygāhna pu'çxmée, adx jil'phuni i'kwe'sxtxi pu'çxwa'ja's Dxusna dukhe'nja jĩna we'weçxaçxáa, neywe'sxtxi' pu'çxmeetewa ewa' jĩ'tx. Nawa i'kwe'sxa' txā'wē yaçgawe'sx kaapiya'jniçxá's kxtey nwēese'jçxa', Dxus jxkaahni yu'sa' kxtey yu'çmeei'kwe, naasáa Dxus jxkaahnimeçxáatx i'kwe kijkihnawa jxuka kxtey yu'.

<sup>14</sup>Jesusa' ki'kin nasatx we'weçxa' na'jik:

—Mwēesē'jwe jxukaysa, ew jiyuya': <sup>15</sup>Kĩh ũ'wa tutxhteçxáa khēesa yu', nasatx ewmeesa vxitu'çme!. Naasáa ũsuh ewmée yaakxnisa yuuçxáak nasatx ewmeesa vxitu'. <sup>16</sup>Aça' maawa jiyuwa'jsa ũsçxa', jiyune'kwe jĩçxak nvxiht.

<sup>17</sup>Txajũ' Jesusa' nasatx txuteeçxa' yattek u'ka. Aça' txāa yakh u'jusawe'sxa' jiyumeeçxa' pējxtxi txā'wē pta'sxni's. <sup>18</sup>Aça' Jesusa' na'wēk we'wena pta'sx:

—¿I'kwe'sxwa jiyu'çmeewá'kwe? Kĩh ũ'wa tutxhteçxáa khēeçxa', nasatx ewméesa yu' vxitmeena sũju'çmeewá'kwe. <sup>19</sup>Txāa pa'gategy kĩh ũ'wa ũuste yu' u'kamée tutxhteçxáa khēeçxa', txajũ ki' kaseje'k jĩk.

Jesusa' txā'wē we'weçxa': ũ'nisa yu' kĩhwa jxuka ewsaçxaçxáata' jĩçxak txā'jĩ'.

<sup>20</sup>Nawa ũsuh ewmée yaakxnisa yuuçxáak nasa's ewmeesa vxitu'.

<sup>21</sup>Txāa pa'gategy, kazx yaakxni, ptamsaçxawa vxite yakh kazx yuuna fxi'zeni, kazx yuuni, nasa ikhni, <sup>22</sup>pesweeni, vxite jĩ's kusa'jçxa jil'phu wēeni, pthāaweni, ĩsxĩini, vxitetx ahçena fxi'zeni, wēesxuni, kazx we'wena fxi'zeni, iwejçx iwejçx yajkxna fxi'zeni, kĩhtewa ewmeeçxáa yūuna fxi'zeni <sup>23</sup>txā'wē ewmée yaakxnisa' ũustewe'sxta'. Txāasatx txā'wē kaaũusuthe'jçxa, nasa's ewmeesa vxitu'.

### **Teeçx u'y judiu jil'jmeesa Jesusa's jxpa'gasa**

(Mt 15.21-28)

<sup>24</sup>Jesusa' txāajũ kasehçxa', Tiro Sidon çxhab ja'dasuk pekũjxa' u'j. Sa' kxsũ pa'lçxa', teeçx yatte u'kaçxa, kim yuhwa jiyu jxthāasme'. Nawa kim yuhwa jiyunimeete u'juya' yu' ājāme!. <sup>25-26</sup>Txajũ' teeçx u'y Sirof Xenicia kiwetewe'sxa' Jesus pa'ljni's jiyuçxa pa'kh. Sa' tasxte peejxũkweçxa pxthaa we'wek:

—Niisa jil'phthu txā'sa' eçx luuku vxit-sak iiyamu. Aça' txāa eçxa's nuukutxi'jine'ga ũusu jĩna pi'kxte!, <sup>27</sup>Jesus pasçxa na'jik:

—Mũyhaswe, luuçx khuē'y ũ'kahn. Txā'wē luuçx ũ'wa'ja's kusa'lçxa alkutx ũswal'jme' jĩte!, <sup>28</sup>txāa u'y pasçxa'!

—Isa yuh we'we'g, txā'wē yuja'. Nawa alku' mesa dxiisu ūsçxa', pejka ũ'wē'tx luuçx ũ' pe'yaçxáatxwa jīte', <sup>29</sup>Jesus pasçxa':

—Isa, txā'wē yuja'. Aça' me'jwe, i'kwe jxthāasni's uyuune'kwe, eçx luuku vxit-sa' i'kwe niisa ũusu kasejxā'kh jīte', <sup>30</sup>txāa u'ya' yatna sxawedçxa uyku, eçxa' ũusu kasehte' wēt yā'j kamaga ũste.

### Teeçx piçthē'j wēse'jya' we'weya'wa ājasame's Jesus nuykatxhini

<sup>31</sup>Jesusa' ki'kin Tiro kiwejū kasehçxa, Sidon çxhabyu vxite' Dekapolis kiwey uykhēwna u'jçxa, Galilea īkh walatek pa'j. <sup>32</sup>Kxteea' teeçx piçthē'j wēsē'jya' we'weya'wa ājāsame'stxi Jesus tasxte nuypa'jçxa pxthaa we'we nuykatxhikahn. <sup>33</sup>Aça' Jesusa' txāa āçā'sa's nasameete fxii pe'jna u'jçxa, thū'wē kafxte pdxi'p jxa'dxna'wa, txajx fxne'sxa's kuse vxiçte kuuçhe'jna', thunetewa jxa'dxku. <sup>34</sup>Sa' ũusdxi'na cielute pagayçxa:

—jEfxata!—jīk, tee phaate jīçxak txā'jī'.

<sup>35</sup>Txā'jīçpkaçxha', thū'wē kafxa' phaateçx, aça' thunewa ewuute', ew we'weya' ājāk. <sup>36</sup>Txajū' txāa nasatxi' Jesusa' wala neewe'wek, txā'wē yūuni's kim yuhtxwa pta'sxkahn. Txā'wē ew neewe'wetewa, jwee'fīçxáatx mtee mteewa pta'sxna jxā'j. <sup>37</sup>Txā'wē yūute', nasa jxukaysa wala kuh jwed yaaki'tx na'jīna:

—Āçā' ma'wēsaxwa jxukak pu'çxhi'. Wēsē'jya' ājāsameetxwa kwēesē'je'kh, sa' we'weya' ājāsameetxwa kwe'we'je'kh jī'tx.

### Kuatro mil nasatx Jesus sã'jīni

(Mt 15.32-39)

**8** <sup>1</sup>Txāa entey nasa iiméh wala kuh pkhaakheçxa kīh yuhwa ũ'wa'j jī'phmeete', Jesusa' txāa yakh u'jusawe'sxtxi pa'yaçxa na'jīk:

<sup>2</sup>—Naa nasa' tekh en yā'j adx yakh ũsta', nawa kīh yuhwa ũ'wa'j jī'phmeeta' aça' adxa' peeygāja'th. <sup>3</sup>Kīh yuhwa puuçmēe yatna kaathe', maafī yu' jxu'juwe'sxta' na' wēeçxa dxi'the çxhāçxhameetxna jīte', <sup>4</sup>txāa yakh u'jusawe'sx pasçxa':

—çMa'wē puuçya' ya'ājā'kx, aysū' nasaa yatçxāa yuhwa meeta' aça'? jīte', <sup>5</sup>Jesus pējxçxa':

—I'kwe'sxa' çmaz pan jī'phkwe? jīte':

—Sieteçxāa jī'ptha'w jīnatx pas.

<sup>6</sup>Txajū' Jesusa' nasatx kiwesu kaçxkaahçxa', siete pantxi jxpa'gaçxa Dxusna weçxana'wa, pe'ltedeçxa txāa yakh u'jusawe'sxtxi ũsu'sku, nasa txazkuēesatx puuçkahn. Aça' txāawe'sxa' kxtey yuutx. <sup>7</sup>Sa' wedxwa jī'phu'tx kuhmeekwe, aça' Jesusa' Dxusna weçxana'wa, txāa wedxtxi txudeedekaakh. <sup>8</sup>Aça' jxukaysa txiktxi ũ'. Txāa ũ' kijxaate' siete kanastate utatx pkhakh. <sup>9</sup>Txāa ente txā'wē ũ'sa' quatro mil āhtx yu'. Txajū' Jesusa' nasatx kaahna'wa, <sup>10</sup>txāa yu' barkote khēek txāa yakh u'jusawe'sx yakh Dalmanuta kiwen u'jya'.

**Fxariseowe'sx cieluju kīhçxáawa kaavxya'ja'khaahni**  
(Mt 16.1-4; Lk 12.54-56)

<sup>11</sup>Kxtee pa'the', fxariseowe'sxwa pa'l'çxa Jesus yakh puutx we'wetx. Sa' ma'wē yūutewa jiyuya' Jesusa's pējxtxi:

—Cieluju kīhçxáawa mkaavxya'ja'j jīna.

<sup>12</sup>Txā'jīte', Jesusa' wala nxus yajkxna na'jīk:

—Naa nasa' çkījxa'ki'tx txā'wē cieluju kaavxya'ja'j jxthāasu'? Isa yu' txāa nasatxi' kīhwa kaavxya'ja'jnimée wejx ewna jīk. <sup>13</sup>Txā'jīçxa', nasatx nvxihtna' ki'kin barkote khēena'wa ikh kuten u'kh.

**Fxariseowe'sx kaapiya'jni's lewadura yakh kaaja'da'jni**  
(Mt 16.5-12)

<sup>14</sup>Sa' peçxkanaçxa ū'wa'j yu' ji'phmée barkote u'jweççxatx yajkx. Naasáa teeçx pançxáatx ji'ph yu'. <sup>15</sup>Txajū' Jesusa' na'wēk jxpa'yakx kaah:

—Mpa'yajkxwe, Herodes vxite' fxariseowe'sx lewadura ewmeesa's jīte',

<sup>16</sup>Jesus yakh u'jusawe'sxa' txāawe'sx pwe'sx na'jīnatx puutx we'we:

—Pan ji'phmeetha'w, txāa pa'gane' txā'jī' jītx. <sup>17</sup>Aça' Jesus wēsē'jçxa na'jīk:

—çMaa sūhçxakwe txā'wē pan ji'phmeetha'w jīna we'wé'? çĀçxpkaçx jiyu'çmeewá'kwe, pan ji'phmeetewa thēymée sāl'jīni's yaaki'çmeewá'kwe? çI'kwe'sx ūuste khēje'çmeewá'? <sup>18</sup>I'kwe'sxa' yafxju yu' uyçxawa, jiyuya' yu' ājā'çmeewá'kwe, sa' adxa' kīhnawa thēymée ājāni's yaaki'çmeewá'kwe. <sup>19</sup>Miiyajkxwe wakx: Tahç pantxi txudeedeçxa cinko mil nasatx puuçte', çmaz kanastakwe pkhakh kijxasaatxi'? jīte', txāawe'sx pasçxa':

—Doce kanastatha'w pkhakh jītx.

<sup>20</sup>—Aça' siete pantxi txudeedeçxa kuarto mil nasatx puuçte', çmaz kanastakwe pkhakh kijxasaatxi'? jīte', txāawe'sx pasçxa':

—Siete kanastate utatha'w pkhakh jītx.

<sup>21</sup>Aça' Jesus we'weçxa':

—Txā'wē thēymée yūunisatxi' yaaki'çmeewá'kwe sane'kwe txā'wē ū'wa'j pan ji'phmeetha'w jīna we'we'.

**Teeçx piçthē'j uyya' ājāsame's Jesus nuykatxhini**

<sup>22</sup>Txajū' Jesusa' Beçaida çxhabte pa'the', kxteea' teeçx piçthē'j uyya' ājāsame'stxi nuypal', nuykatxhikahn pxthaa we'wena. <sup>23</sup>Aça' Jesusa' txāa uyya' ājāsamée kusete pu'kisçxa, çxhab eka pe'jna u'l'çxa, yafxte fxne'sx sxūsna'wa yafxte jxa'dxku. Txā'wē yūuçxa pējxku:

—çMa'wēçxá' uyu'gá'? jīte', thegu'gçxa':

<sup>24</sup>—Nasa' fxtūu taxs na'wēçxáatx vxya', nawa ēsē'se'tx jīk.

<sup>25</sup>Txajū' Jesusa' ki'kin txajx kuseju yafxte jxa'dxku, aça' yafxa' phaate' ew uyya' ājāk.

<sup>26</sup>Txajü' Jesusa' neewe'wek:

—Çxhabsu u'kameene'ga, sa' maa yuhtxwa pta'sxmeene'ga iidx yafxtxi kim phaadetewa jînak yatna kaah.

**Pedro' jiyuk Jesusa' Dxus tasxu yuusatewa**

*(Mt 16.13-20; Lk 9.18-21)*

<sup>27</sup>Jesusa' txãajü ki' u'kh txãa yakh u'jusawe'sx yakh kasehçxa. Sa' Fxilipo vxitni çxhab Cesarea ja'dasuk pekûjxa' u'jweç yu'. Txajü' dxi'the u'jweçüi txãawe'sxtxi pëjxku na'lîna:

—Adxa's çkimna jî'ta nasa'? jîte', <sup>28</sup>txãawe'sx pasçxa':

—Maañi yu': Juan Bautistana jî'tx. Aça' vxite we'weçxa': Eliasna jî'tx. Aça' vxite we'wesa': Txãniiteywa ma'wëta Dxus yuwe pta'sxsa kaseje' txã'wëysana jî'tx jîte', <sup>29</sup>Jesusa' na'lînak pëjx:

—Aça' i'kwe'sxa' çkimna süju'kwe?

Txã'wë pëjxte', Pedro pasçxa':

—Idxa' Kristo, Dxus tasxu yuusag jîte', <sup>30</sup>Jesusa' maa yuhtxwa pta'sxkaahme'.

**Jesusa' txajx uuwa'ja's pta'sxni**

*(Mt 16.21-28; Lk 9.22-27)*

<sup>31</sup>Txajü' Jesusa' pta'sxku:

—Dxus Nçxi'k Nasa Yuusa' wala pkxuuni pa'ga yuuna, sa' judiu nthê'jsawe'sx vxite' sacerdote npiiçthê'jwe'sx vxite' Dxus leya's kaapiya'jsawe'sx ahççxa kiikhe'jetxna. Aça' uuçxawa tekhe'ente' ki' itxî yuuna jîk.

<sup>32</sup>Jesusa' txã'wëk ew äate pta'sx. Aça' Pedro' Jesusa's fxiite pe'jna u'lçxa, yu'kxpejk. <sup>33</sup>Txã'wë yu'kxpehte', Jesusa' vxitetx yu'thegçxa', Pedro's na'lînak pas:

—Eçxthê'j, adx tasxu mtuxuté. Idxa' Dxus jxthãasni yu'sa' kxtey yuumée, naa kiwete nasaa yaakxnîçxá'sgu kxtey yuu wëjê' jîçxa',

<sup>34</sup>Jesusa' txãa yakh yuusawe'sxtxi pa'yaçxa na'lîk:

—Maa nasawa adx yakh yuu wëeçxa', peekx kakwe jxthãasni's kîhnawa jxuka nvxihtçxa yuuçxáa adx yakh yujxa' äjãne'kwe, makwe thëysa uuwa'l ma'k palj nawa txã'sa' yajxmée. <sup>35</sup>Nawa naa kiwete itxî fxi'zewal'jçxá's ya'nwe'wesa', Dxus yakh fxi'zewal'j yu'sa' ivxiituna. Naapkaçxha' Dxus yuwe's nwëesê'lçxa adx yakh fxi'zepa'ga naa kiwete itxî fxi'zeni's yajxmée ivxiitusa', Dxus yakh fxi'zewal'j yu'sa' ivxiitumeena. <sup>36</sup>Makwe naa kiwetewe'sx yu'sa' jxuka knayçxawa peekx üus yu's ivxiitute', çkîhteçxá' selpiima'k? <sup>37</sup>Peekx üusa's ivxiituyã'the', çkimçxa' nwe'wema'k?

<sup>38</sup>Maa nasawa adxa's jxpa'gaya' wa'lina adx pta'sxnixwa wa'lutxna nasa ewmeesa açewe'wete açá' txã'wë yüusa's Dxus Nçxi'k Nasa Yuusaawa Dxus angeleswe'sx yakh eena' kweethna kîhçxa' jxpa'gaya' wa'luna jîk.

**9** <sup>1</sup>Txajū' ki'kin we'weçxa' na'ljik Jesusa':  
—Isath we'we', ayte üssa maafi yu' uumey uyuune'kwe Dxus naa kiwete jxkaajxa' kiini's jik.

**Jesusa' zhiçxkwe yu'pthehçxa vxyaani**  
(Mt 17.1-13; Lk 9.28-36)

<sup>2</sup>Txajū' seis en skhēwniite', Jesusa' thā'j walate pe'jna u'kh Pedro Jakobo Juan txāawe'sx tekhsaçxáatx. Kxtee pa'the', Jesus kakwe' fxiyku zhiçxkwe yu'ptheh txāawe'sx yafxte. <sup>3</sup>Txajx athni ropa' yādx na'wēk zhiçxkwe çxihme yuu; naa kiwete maa yuhwa txā'wē zhiçxkwe çxihme yu' thethya' ājāmeetxna. <sup>4</sup>Naapkaçxha' Pedrowe'sx yafxte vxyaatx Elias vxite' Moises. Txāawe'sxa' Jesus yakhtxi puutx we'wena üsu'. <sup>5</sup>Aça' Pedro' txā'wē uyçxa', Jesusa's na'ljik:

—Ayte' kwe'sx üswa'j wala ewa'. Aça' tekx wa' txajaga, teeçxsa' iidx jii, vxite' Moises jii, vxite' Elias jii jik. <sup>6</sup>Pedrowe'sxa' weçxaniite üukhsa na'wētx neeyüu, txāasak Pedro' weçxaniite txā'wē we'we.

<sup>7</sup>Txajū' täaph kihçxa aphku, aça' täaph dxiiyu na'wēk we'weni pthūuse:  
—Na' adx Nçxi'k wala wedxnisa', aça' txā'sa' nwēesē'jna kxtey myuuwe jičpkaçxha' <sup>8</sup>Pedrowe'sxa' thegu'gçxawa, Moiseswe'sxtxi uyemeeta', naasáa Jesusçxáa yā'j üstetx uy.

<sup>9</sup>Aça' thā'ju u'jweççxa', Jesusa' Pedrowe'sxtxi' wala neewe'wek:  
—Āçxhí yu' maa yuhtxwa pta'sxmeene'kwe txā'wē uyni's, naasáa Dxus Nçxi'k Nasa Yuusáa uuçxawa ki' itxi yuuniijū pta'sxine'kwe.

<sup>10</sup>Txā'wē neewe'weni's kxtey nwēesē'jtx kim yuhtxwa tuuthe'jmée. Nawa txāawe'sx pwe'sx yu' puutx paapēy'itx: Uuyā'jçxa', çma'wē ki' itxi yuukx? jina.

<sup>11</sup>Txajū' na'wē kaapiya'ljni'stxi Jesusa's paapējx:  
—Dxus leya's kaapiya'jsawe'sxa' Elias khuē'y yaçte pa'jana jī'tx sa' çma'wē yuuwa'jsakx açki'tx txā'jī'? jite', <sup>12</sup>Jesusa' na'wēk pta'sx:  
—Isa, Elias khuē'y yuh yaçte pa'jçxa jxuka pheu'jwa'jsa yu'k aça' isa yuh pta'sxi'ne'ta. Txā'wēy Dxus Nçxi'k Nasa Yuusa's we'weçxa': wala pxthaa yuuna nasa ahçççxa pkxuuni jina Dxus librute fxi'ljni üsa' txāawa isa yuja'. <sup>13</sup>Eliasa' pa'jana jī'tx aça' Eliasa' pa'jyujk, nawa txā'sa' kijkihwa yūutx Dxus librute ma'wē fxi'ljni üsna txā'wēy.

**Teeçx luuçx wēeçpa'jsa's Jesus nuykatxhini**  
(Mt 17.14-21; Lk 9.37-43)

<sup>14</sup>Txajū' Jesusa' vxitesa neeyūutx kxtee sxawedna kijjaçte', nasa wala pxhaakhena üsu'tx. Aça' Dxus leya's kaapiya'jsawe'sx yu' txāawe'sx yakhtxi wala we'wena üsu'. <sup>15</sup>Naapkaçxha' Jesus yuhtewa jiiimée üsiyna, Jesus pa'jaçyā'the uyçxa', nasa' jxukaysa üukh yajkxnatx weçxaya' utxáa. <sup>16</sup>Txajū' Dxus leya's kaapiya'jsawe'sxtxi' Jesusa' pējxku:

—¿Kĩh yũupa'ga txakwe weeçx we'wena ũskwe? jíte!, <sup>17</sup>txāa nasa wala ksxavxyte teeçxsa' Jesusa's na'jĩnak pta'sx:

—Adx nçxi'ka's eçx luuku vxit-sa iiyamute' we'weya' ājā'çme' txā'snath ayte nuypa'j. <sup>18</sup>Txāa luuçxa' mtee ũstewa eçx luuku vxit yā'the', ki'thtxi ksuusu'ljna yuwesu bu'çxçxáak sēhna weté!. Txā'wē yũuna wala talxiça'. Aça' idx yakh u'ljusawe'sxtxi' pi'kxyā'th nuykatxhikahn, nawa ājāmeeta' jíte!, <sup>19</sup>Jesus pasçxa':

—Dxusa' pu'çxhina sũhwa'j yu'sa' ji'phmeesata' naa nasa'. ¿Bagaçxpkaçx i'kwe'sx yakh pu'çxna ũs ya'watka? ¿Bagaçxpkaçx ājāmée fxi'ze ya'wakwe? Txāa luuçxa's mneejxũhwe ayte jíte!, nuykühtx Jesus tasxte. <sup>20</sup>Aça' eçx luuku vxit-sa' txāa luuçxa's kaywēçxpa'ja'the', kiwesu wetek yuwesu bu'çxçxáa sēhna.

<sup>21</sup>Txajũ' Jesusa' luuçx neya's pējxku:

—Txā'wē āçā'ni ¿makwe txaçx yuuçna? jíte'!

—Le'çxfík txā'wē yu'. <sup>22</sup>Sa' maa entey yu' txaçxmeynak wēeçxpa'lçxa ipxte khēena yu'khēwa khēena uupçxāh yuuna u'ju'. Aça' kxaht idx yakh ewupçxāhte', ma'wēçxáawa pu'çxhine'ga peeygāhçxa jina pi'ki' jíte'!

<sup>23</sup>—Idx yuu txā'wē Dxusa' pu'çxhina sũhte yu', kĩhwa jxuka kxtey yuuna txā'wē yaakxsa's jíte!, <sup>24</sup>luuçx neya' susku we'wena pxthaa pi'kx:

—Dxusa' pu'çxyujuna sũju'th, sa' adx ũuste txā'wē yaakxwa'ja's jweeíçxáa wala meen kaajiyu'j jík.

<sup>25</sup>Txajũ' Jesusa' nasa wala kuh pkhaakhena utaaçte uyçxa', eçx luuku vxit-sa's na'jĩnak we'we:

—Eçx luuku vxit-sa kwe'we'je'çmeeg, sa' wēsē'jwe'sxte thũ'wētxwa aphgu, nawa āçxha' adx we'weni's nwēesē'lçxa ũusu mkaaseh, peena yu' u'kameene'ga jíte!, <sup>26</sup>eçx luuku vxit-sa' txāa luuçxa's sus kweeyi'ljna kaywēçxpa'ja'lçxa kasejk. Aça' txāa luuçxa' uuní na'wēk wetena neeyũ.

Kxahtx nasa we'weçxa':

—Āçxha' pejka uuk jina we'we'.

<sup>27</sup>Nawa Jesusa' kuseju pu'kisku, aça' txāa luuçxa' kiitek.

<sup>28</sup>Jesusa' txāajũ u'lçxa', teeçx yattek u'ka. Aça' txāa yakh u'ljusawe'sxa' pējxtxi:

—Kwe'sxa' ¿kĩh yũuçxakxtha'w eçxa's kutxi'lja' ājāmée? jíte!, <sup>29</sup>Jesusa' pta'sxku:

—Na'wēsa eçxa' thēymée yu' kasehmeena, wala yũunaana Dxus yakh puutx we'wete yuuçxáa kasejena jík.

### Jesusa' txajx uuwa'ja's ki' pta'sxni

(Mt 17.22-23; Lk 9.43-45)

<sup>30-31</sup>Txajũ ki' u'lçxa', Galilea kiwenku u'l. Sa' kxteea' txāa yakh u'ljusawe'sxtxi' kaapiya'lja'j ji'phu' naa pa'ga kim yuhwa jiyu jxthāasme'. Sa' dxi'the u'ljweççxa', na'wēk txajx uuwa'ja's pta'sx:

—Dxus Nçxi'k Nasa Yuusá's nasa ewmeesa kusete dukhni yuuwa'ja', aça' txāawe'sxa' ikhetxna. Aça' uuçxawa, tekh ente' ki' itxĩ yuuna jítewa, <sup>32</sup>txāa yakh u'jusawe'sxa' jiyumeeta', nawa pějxya' yu' ũukhtxi.

**Kim wejx jxthaakwe jxtuhthesakx**  
(Mt 18.1-5; Lk 9.46-48)

<sup>33</sup>Sa' Kapernaum çxhabte teeçx yatte pa'jçxa', txāa yakh u'jusawe'sxtxi paapējxku na'jīna:

—I'kwe'sxa' dxi'the yuhçxa', çkijkwe puutx we'we'? jítewa, <sup>34</sup>txāawe'sxa' thaameçxa pasmeeta' txā'wē dxi'the yuhçxa', çmaa wejx jxthaakwe walasakxtha'w? jīna puutx we'weçxawa.

<sup>35</sup>Txajū' Jesusa' docesatx pa'yaçxa kaççxa pta'sxku:

—Maatewa jxthaakwe walasa yuu wēçxa', iiwejçx yajkxmée maatxwa jxuka selpiiçxa yuuçxāa jxthaakwe walasa yuuna. <sup>36</sup>Txā'jīçxa' teeçx luuçxkuē's txāawe'sx ksxavxyte txahçxa kusete yakhçxa na'wēk we'we:

<sup>37</sup>—Maa nasawa adxna wa'lmée jxpa'gasa' adx na'wēy luuçx na'wēkwesatxwa ahçemée jxpa'gatxna. Txā'wē yūusa' adxna jxpa'gasaçxa txā'wē yuutxna. Sa' adxna jxpa'gasa' adxçxāana jxpa'gamée, adxna kaahsa'swa jxpa'gasa yuutxna jīk.

**Kwe'sxtxi açesamée yu' kwe'sx yakh fxi'zesatxna**  
(Mt 10.42; Lk 9.49-50)

<sup>38</sup>Txajū' Juana' na'wēk pta'sx:

—Idx çma'jīki'g? Kwe'sxa' teeçx piçthē'j uytha'w txā' eçx luuku vxit-satx nasaa ũusu kutxi'ji'k Jesusku jxkaaja' jīna we'weçxa. Nawa txā'sa' jwee yu' txā'wē yūukaahmeetha'w kwe'sx yakh u'jusame' naa pa'ga jīte', <sup>39</sup>Jesus paççxa':

—Txā'wē yūunuwe, txāa pa'gatey adx yase's kxsuusçxa eçx luuku vxit-satx nasaa ũusu kutxi'jsa' adxa's açewe'wemeena kim yuhwa. <sup>40</sup>Maawa kwe'sxtxi açewe'wesamée yu', kwe'sxtxi pu'ççxa íçxáatxna. <sup>41</sup>Na'jī'th na': I'kwe'sxa' Dxus luuçxi'kwe naapa'ga maawa i'kwe'sxtxi peeygāhna teeçx tasa yu'çxāawa yusuna txā'sa' dewení yuuna.

**Pkalte kweete'jya'mée jxpa'yakxwa'ja'**  
(Mt 18.6-9; Lk 17.1-2)

<sup>42</sup>—Mpa'yajkxwe, txā'wēme' luuçxkuē adxa's yaakxsatx pkalte kweete'jena txā'sa' txhikhte skuutxh ũ'khni kweta's tudçxa íkh wala dxiikhē akhwaççxāa, wejx ewna. <sup>43</sup>Meeçxawa iidx kuse txā'wē pkalte idxa's kweete'jeçte', mespē'th. E'z kuse yakh uu kiwete khēe na'wē', wejxwa teeçx kuseçxāa jī'phçxawa pçumée itxĩ fxi'zewa'the u'kani wejx ewa'. Txā'wēme' uu kiwete ipx wala seena'sa багаçxte yuhwa ũçxhawa'jsame'. <sup>44</sup>Kxteea' багаçxte yuhwa wesa' çxhavxyña pçuwa'jsameeta', aça' ipx seena'sawa ũçxhawa'jsame'. <sup>45</sup>Txā'wēy iidx çxidawa

pkalte kweete'jeçte', txã'swa mespê'th. E'z çxida yakh uu kiwete khêe na'wê', wejxwa teeçx çxidaçxáa ji'phçxawa pçumée itxĩ fxi'zewa'the u'lkani wejx ewna. Txã'wême' infxiernote ipxa' bagaçxte yuhwa ùçxhawa'jsame!. <sup>46</sup>Kxteea' bagaçxte yuhwa wesa' çxhavxyna pçuwa'jsameeta', aça' ipx seena'sawa ùçxhawa'jsame!. <sup>47</sup>Txã'wêy iidx yafxwa pkalte kweete'jpçxãh yuuçte', mkuutxi'j. E'z yafx yakh infxiernote khêe na'wê', wejxwa teeçx yafx yakhçxáawa Dxus jxkaahna üsnite u'lkani wejx ewna. <sup>48</sup>Txã'wême' kxteea' bagaçxte yuhwa wesa' çxhavxyna pçuwa'jsameeta', aça' ipx seena'sawa ùçxhawa'jsame!. <sup>49</sup>Txãa pa'gatey txãa ipxa' kaapçu'ju'jwa'jsame!.

<sup>50</sup>Nega' wala seelpisa'. Nawa sxüukãhte', çma'wê kselpi'jya' ewuutxki? I'kwe'sxa' nega na'wêy selpiina mfxi'zewe, jxukaysa yakh ewçxáa.

### Ptamsa txuteewa'jme's Jesus kaapiya'jni

(Mt 19.1-12; Lk 16.18)

**10** <sup>1</sup>Jesusa' Kapernaum çxhabu kasehçxa', Judea kiwen vxite' Jordan yu'wala kutenku u'j kxsü peküjxa'. Sa' Jordan yu'wala kuteju üste', wala nasa pkhaakhe'tx txajx üsnite. Aça' kxteea' kaapiya'ja'kh vxite ahsü na'wêy.

<sup>2</sup>Naapkaçxha' fxariseowe'sxa' Jesus tasxte utxaaçxa' na'wêtx paapëjx, pasya' sxiiçte' ewmêe vxit-ya' sühçxa:

—Ptamsaçxawa, nyu's wãatãhte çewmanx? jite', <sup>3</sup>Jesus pasçxa':

—Jiimeewá'kwe Moises jxkaahni's jina pëjxte', <sup>4</sup>txãawe'sx pasçxa':

—Moises jxkaahçxa', nyu's wãatãjxa' ewuweçxte', nyu kazx yuuna fxi'zeni's eçte fxi'jçxa dukhçxak txuteekaja' jite', <sup>5</sup>Jesus pasçxa':

—Moisesa' txã'wê yüuwa'ja's nvxiht yujk, nawa peekx nyu kíhwa yüumeetewa wãatãhna fxi'zepa'ga íçxáak txã'wê yüuwa'ja's nvxiht, peekxçxáa yu' wãatãjxa' äjãkahmén. <sup>6</sup>Nawa Dxusa' nyafxiiitey naa kiwe's pheu'jii e'zítz ja'daçxajk vxit piçthê'j petx u'y yã'jçxa. <sup>7</sup>Aça' txãa pa'ga piçthê'ja' peekx neywe'sx tasxu txuteewa'jsa', nyu yuwa'jsa yakh utxaaya', <sup>8</sup>txã'wê e'zçxawa, teeçxsaçxáa na'wê yuuna pa'jya'. Aça' txã'wê yüuniijü' e'zmêe teeçxçxáak yuuna pa'ja'. <sup>9</sup>Txãa pa'ga Dxus püpçxça nvxiitni ptamsayã'txhi' kim yuhwa txuhdeya' äjãwa'jsameeta' jik.

<sup>10</sup>Txajü' Jesusa' teeçx yatte u'kate', txãa yakh u'jusawe'sxa' txã'wê pta'sxni's ki' pëjxtxi. <sup>11</sup>Aça' Jesusa' pta'sxku:

—Maa piçthê'jwa peekx nyu's wãatãhçxa vxite yakh ptamuuçxa', pkalte weteena, peekx nyu's wãatãhçxa vxite yakh ptamuupa'ga. <sup>12</sup>Aça' u'ywa txã'wêy nmi'a's wãatãhçxa vxite yakh ptamuuçxa', txãawa pkalteyçxáa weteena peekx nmi'a's wãatãhçxa vxite yakh ptamuupa'ga jik.

### LuuçxkuëtX Jesus bedekiyini

(Mt 19.13-15; Lk 18.15-17)

<sup>13</sup>Txãa e'su' Jesus tasxte luuçxkuëtX nuypa'jtx Dxus kusete neewe'wekahn. Aça' Jesus yakh u'jusawe'sxa' yuptyi luuçxkuëtX nuypa'jsatx. <sup>14</sup>Txã'wê yüute', Jesusa' na'jïnak üusçxa we'we:

—Luuçxkuẽ adx tasxte yuusaatxi' kuçx yupnuwe, txãa pa'gatey Dxus jxkaahna ùsnisa' naa luuçxkuẽwe'sx na'wësa jîi fiçxá'. <sup>15</sup>Na'jî'th na': maawa luuçxkuẽ na'wë Dxus jxkaahwa'j ena's wa'lmée jxpa'gameeçxa yu', bagaçxte yuhwa Dxus tasxte u'kaya' âjãmeetxna. <sup>16</sup>Txã'jîna'wa luuçxkuẽtx yakhna' dxikthesu peekizeçxa Dxus kusete neewe'wek.

**Piçtakx wala ji'phsa Jesus yakh puutx we'weni**

(Mt 19.16-30; Lk 18.18-30)

<sup>17</sup>Txajû' Jesusa' vxite ahn u'jweçte', teeçx piçtakx dxi'the wuwuuna kühçxa', Jesus tasxte peejxükwek na'wë paapëjxna:

—Kaapiya'jsa wala ewsa mpeeta'sx. Adxa' çma'wë yüuçxa pçuwa'jmée ïtxî fxi'zewa'ja's ji'phuki'th? jîte', <sup>18</sup>Jesus pasçxa':

—çKîh yuupa'gaga adxa's ewsa jî'? Naa kiwete' teeçx nasaçxáa yuhwa ewsa yu' meeta'. Dxus yuuçxáa ewsa ùsa'. <sup>19</sup>Idxa' jiine'ga Dxus jxkaahni na'wësatxi': Ptamsa' vxite yakh pkal yuuwa'jme', nasa ikhwa'jme', pesweewa'jme', vxitetx îsxiina nuywe'wewa'jme', vxitee jîitx kusa'jwa'jme'. Neywe'sxtxi peeygähna ewçxáa yüuna fxi'zewa'ja' jîte', <sup>20</sup>txãa piçtakx txã'wë wësê'jçxa' na'wëk pas:

—Txã'wë jxkaahnisatxi' le'çxkuëjüjx jxuka kxtey yuunath waláa jîte', <sup>21</sup>Jesusa' txãa piçtakxa's peeygähna thegçxa' na'jîk:

—Na'wë yüuwa'jçxáa peejxa': Iidx ji'phuni's jxuka txweyçxa, puuple ji'phmeesatx peesya' me'j. Txã'wë yüuçxa', cielute ji'phsa yuune'ga. Txã'wë yüuçxa adx yakh myuh, makwe seena' nxussa pa'thewa txãatxi' yajkxmée jîte', <sup>22</sup>txãa piçtakxa' wala ji'phsa yu'k, sa' txã'wë wësê'jçxa', wala nxusna u'kh.

<sup>23</sup>Txajû' Jesusa' nasatx thegçxa' pta'sxku txãa yakh u'jusawe'sxtxi:

—Maawa wala ji'phsa yakha' Dxus jxkaahna ùsnite u'kawa'j wala yuh thëya' jîte', <sup>24</sup>txãa yakh u'jusawe'sx wësê'jçxa', jiyumée kuh jwed yajkxnatx neeyüu. Aça' Jesusa' âatek pta'sx:

—Naa kiwete ji'phuniçxá's jxthaakwe yaakxa yakha' wala yuh thëya' Dxus jxkaahnite u'kawa'ja'. <sup>25</sup>Maawa wala ji'phsa' Dxus jxkaahnite wala thëy u'katxna. Aça' txã'wë thëysa's yajkxte yu', kamelxo yuhwa thëymée wáa yüz kafxga u'kaya' âjãtxna jîk. <sup>26</sup>Txã'wë wësê'jçxa', wala kuh yajkxna na'wëtx puutx paapëyi':

—Txã'wëte', ji'phsa' çkimçxá' cielute u'kaya' âjama'tx? jîte', <sup>27</sup>Jesusa' txãawe'sxtxi thegçxa' na'wëk we'we:

—Naa kiwete nasa' Dxus ùsnite u'ka wëeçxa txãawe'sx kakwejuçxáa pa'pçxuçxa' âjãmeetxna. Nawa Dxusna pi'kxçxa yu', thëymée âjãtxna. Dxus yakha' kîh yuhwa thëysa meea'.

<sup>28</sup>Txajû' Pedro' na'wëk we'we:

—Kwe'sxa' idx yakh yujxa', kwe'sx ji'phuni's jxuka nvxihttha'w kîhnawa jîte', <sup>29</sup>Jesusa' na'wëk pta'sx:

—Adxa' isath we'we': Dxus yuwe ewsa's jxpa'gaçxa adx yakh fxi'ze wēçxa', kīhnawa jxuka nvxiitutxna yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txā'wēsatsx. <sup>30</sup>Aça' txā'wē yūusa' makwe yahçena fxi'zeçxawa txāawe'sx nvxiitniite puutejka jxthaakwe wala uyuutxna naa kiwete'y: yat, kiwe, nyakhwe'sx, npe'sxwe'sx, nji'jwe'sx, nçxi'kwe'sx, niisawe'sx txā'wēysatsx. Sa' vxite kiwete!', pçumée itxī fxi'zewa'ja's jxpa'gatxna. <sup>31</sup>Nawa jxpa'yakxmeete', makwe yaçtewe'sxçxawa, nmehtewe'sx yuutxna; naapkaçxha' nmehtewe'sx yu', yaçtewe'sx yuutxna jik.

**Jesusa' txajx uuwa'ja's ki' pta'sxni**

*(Mt 20.17-19; Lk 18.31-34)*

<sup>32</sup>Jesusa' Jerusamente pa'jya' u'ljweçku yu', aça' txāa yakh u'ljusawe'sxa' ūkhçxa e'stetx u'ljwe' Jesusa's yaçte akhçxa. Txajū' Jesusa' docesaçxáatx fxiite pa'yaçxa pta'sxku txā'sa' kīh yūuya'watewa:

<sup>33</sup>—I'kwe'sxa' jii yā'ji'kwe Jerusamente pa'jya' u'ljweçtha'w. Aça' kxte' Dxus Nçxi'k Nasa Yuusa's uweçxa dukhni yuuna Dxus leya's kaapiya'jsawe'sx vxite' sacerdote npiičthē'ljwe'sx kusete. Aça' txāawe'sxa' ikhwa'j vxitçxa judiu ji'jmée vxite nasats dukhetxna ikhkahn. <sup>34</sup>Aça' txāa nasa' npeevxysxijkana peçxujkwena fxne'sx avxythethna txā'wē yūuçxa ikhetxna. Nawa tekx ente' ki' itxī yuuna jik.

**Jakobowe'sx nji'j Jesusa's pēyni**

*(Mt 20.20-28)*

<sup>35</sup>Txajū' Zebedeo nçxi'kwe'sx Jakobo vxite' Juan txāawe'sxa' Jesus tasxte utxaaçxa na'wētçx pējx:

—Kwe'sxa' idxa'stha'w pēyi' kwe'sx pēyni's kxtey yuukahn jīte',

<sup>36</sup>Jesusa' pējxku:

—¿Kījkwe yūu jxthāasu'? jīna.

<sup>37</sup>Aça' txāawe'sx e'zsa' na'wētçx pējx:

—Idxa' naa kiwete jxkaajxa' kīhçxa', kwe'sx e'zsats iidx pukakhē pdxi'p kaçxwa'ja's ūsune'ga jīnatx pējx. <sup>38</sup>Aça' Jesus pasçxa':

—I'kwe'sxa' jiimeeçxa i'kwe txā'wē pēyi'. I'kwe'sxa' adx na'wēy pxtxaa yuuçxa uuwa'ja's ūukhmée jxpa'gaya' ¿ajama'kwe? jīna pējxte', <sup>39</sup>txāawe'sxa':

—Aja'nja'w jīnatx pas.

Aça' Jesusa' na'wēk pta'sx:

—Isa, i'kwe'sxa' adx na'wēy pxtxaa yuuçxa uuwa'ja's ūukhmée ji'phuyujune'kwe. <sup>40</sup>Nawa adx pukakhē pdxi'p kaçxwa'ja's adx ūsu'çmeeth pēysats. Txā'sa' txān ente kim jxpa'gawa'jsa yuuna txā'sçxáa ūsni yuuna jik.

<sup>41</sup>Aça' vxite diezsawe'sx txā'wē Jakobowe'sx pēyni's wēsē'ljçxa' ūusaçxatx txāawe'sxtxi'. <sup>42</sup>Txā'wē yūute', Jesusa' pa'yaçxa na'wēk yu'kxpeh:

—I'kwe'sxa' miiyajkxwe: Naa kiwete jxkaahsa walasa' nasatx jxuka jxkaaja'tx juuna'çxáa yuuna khaawāsxijna. <sup>43</sup>Nawa i'kwe'sxa' txā'wēy yuuwa'jsameei'kwe. Makwe jxthaakwesaçxawa, wejxwa vxitetx selpiina mfxi'zewe. <sup>44</sup>I'kwe'sxa' walasa yuu wēeçxa', vxitee jxkaahni selpisáa myuuwe. <sup>45</sup>Txāa pa'gatey Dxus Nçxi'k Nasa Yuusáa yuhwa txā'sna selpfi jxthāasya' kīhme!, wejxwa maazkuēe nasatxwa nwe'wena selpiiya' kīhçxak ya'dukh nxuste uuya'.

### Teeçx piçthē'j uyya' ājāsame's Jesus nuykatxhini

(Mt 20.29-34; Lk 18.35-43)

<sup>46</sup>Txajū' Jerikote pa'lçxa', Jesusa' txāa yakh u'jusawe'sx vxite! kuhsa yakh çxhabu kasehna u'ljweçte!, teeçx piçthē'j uyya' ājāsameek dxi'lj pukate lmusxnu thāasna u'pu'. Txā' Bartimeok yaase yu', Timeo nçxi'k. <sup>47</sup>Sa' Jesus Nasarethuwe'sx utxaaçte wēsē'lçxa', na'ljinak sus we'wena u'pu':

—Jesus, Davxid jil', adxa's meen peeygāh jina.

<sup>48</sup>Aça' nasa yu':

—Sxuuna' myuu, kuçxgu susu' jítewa, jweeíçxáak sus we'we:

—Davxid jil', adxa's meen peeygāh jina.

<sup>49</sup>Txajū' Jesusa' tudte yujuçxa, pa'yakaakh. Aça' pa'yatx na'ljina:

—Kiiteçxa üukhmée myuh, Jesusa' idxa's pa'yaça' jìçpkaçxha', <sup>50</sup>txajx atxha's nvxihtçxa üphçxak kiiteçxa Jesus tasxte utxáa.

<sup>51</sup>Txajū' Jesusa' çkīhga yūu jxthāasu'? jina pējxte!, txāa uyya' ājāsamée pasçxa':

—Adxa' uyya' ājā wējē'th jik.

<sup>52</sup>Aça' Jesus we'weçxa':

—Kaauyu'ljuna sūhçxane'ga adxa's pi'kx txāa pa'ga āçxha' uyna mneeyūu jìçpkaçxha' uyya' ājāk, sa' Jesus e'stey u'kh pi'kxna.

### Jesus Jerusalente u'kani

(Mt 21.1-11; Lk 19.28-40; Jn 12.12-19)

**11** <sup>1</sup>Txajū' Jesusa' Jerusalenna u'ljweççxa', e'z çxhabkuē Betania Betfxagē utxatek pa'lj. Txāa çxhaba' Oliwos vxix dxi'lpgatx neeyū'. Aça' kxtee pa'lçxa' txāa yakh u'jusawe'sx e'zsatx yaçte kaakh na'ljina:

<sup>2</sup>—Çxhab le'çxkuē vxya'k kxtee me'ljwe. Sa' kxtee pa'lçxa', teeçx buçxu kim yuhwa a'jnimeesa tudni ūsna txā'sna jxūkhwedeçxa jxūna yuweene'kwe. <sup>3</sup>Txā'wē yūuçte kim pēyiwáatxna aça' kwe'sxtxi jxpe'jsak nikxya' kaah nawa ki' kaasxweduljuna jīne'kwe. <sup>4</sup>Txā'ljite!, txāawe'sxa' ul'çxa buçxu's uytxi vxitx pukate dxi'lj ju'gu tudni ūste. Aça' jxūna u'ljya' jxūkhwedeçtxi yu'. <sup>5</sup>Naapkaçxha' kxtee thegna ūssa' we'wetx:

—Buçxu's çkīh yūuya' jxūkhwedeçkwe? jina.

<sup>6</sup>Txajū' Jesus ma'wēne' kwe'welj txā'wēy txāawe'sxa' pasteçxáa jxūna kaahtx. <sup>7</sup>Txajū' txāa buçxu's Jesus tasxte nuykūhçxa', txāawe'sx atxhtxi

tpegu'gçxa pustxi, açá' Jesusa' al'jçxa u'kh. <sup>8</sup>Naapkaçxha' vxite yu' Jesus u'l'jwa'l' dxi'jsu yaçtetx txāawe'sx atxhtxi pusna u'l'jwe', açá' vxite' ējxā spē'thçxatx txā'wēy dxi'jsu pusna u'l'jwe' yaçsu. <sup>9</sup>Naapkaçxha' yaçte u'l'jsa vxite' e'ste yuusa txāawe'sxa' na'l'jīnatx weyna u'l'jwe':

—Dxus kaahnisa wala yuh jxtuhthesa yuja'. <sup>10</sup>Wala yuh ew jxkaajana, kwe'sx yaçgawe'sx Davxid na'wēy. Dxusa's weçxaaga wala ew yūupa'ga jī'tx. <sup>11</sup>Jesusa' txā'wēk Jerusalente u'ka dxuus yatte pa'l'. Sa' dxuus yatte kīh ūstewa jxuka thegçxaçxáa ki' kasehna u'kh Betania çxhabnay doce txāa yakh u'l'jusawe'sx yakh, kusuçyā'kh yu' naa pa'ga.

### Higwera fxtūu tasx yūnsame's Jesus açewe'weni

(Mt 21.18-19)

<sup>12</sup>Txajū' kuskuskhē' Jesusa' Betania çxhabu ki' kasehçxa' wēek. <sup>13</sup>Sa' higwera-tasx wala yehçsa ūste uyçxa', thegya' u'kh yūn jī'phwáana sūhçxa. Nawa yūnmée eççxáak jī'ph yu', yūn en meek yu' naa pa'ga. <sup>14</sup>Txajū' Jesusa' na'l'jīnak we'we txāa fxtūu tasxa's:

—Naa fxtūu tasxte yūnni's kim yuhwa ū'meetxna peena yu' jīna we'weçte', txāa yakh u'l'jusawe'sxa' wēsē'jnatx ūsu'.

### Dxuus yatte txweysaatx Jesus kasxisxni

(Mt 21.12-17; Lk 19.45-48; Jn 2.13-22)

<sup>15</sup>Txajū' Jesusa' Jerusalen çxhabte ki' sxawedna pa'l'jçxa', dxuus yatte u'kaçxa kxtee kijkihwa txweyna ki' weyna ūssatx eka kasxisxku, vxuyu yu'pthehsa mesa vxite' tub çxihme txweysa kaçxni pagutx jxuka pūsxna. <sup>16</sup>Sa' kxtee kijkihwa tu'sçxa pa'l'satx kaakūju'jme'. <sup>17</sup>Txajū' na'l'jīnak yu'kxpeh:

—Dxus librute' na'wē fxi'jni ūsa': Adx yata' Dxus yakh puutx we'wena ūswa'l' yatçxá' nasa majūwe'sxwa jī'k. Nawa i'kwe'sxa' peswée pkhaakhena ūsni kafx na'wēçxáa vxitçxa jī'phi'kwe jīte', <sup>18</sup>Dxus leya's kaapiya'l'sawe'sx vxite' sacerdote npiiçthē'l'jwe'sx wēsē'l'jçxa', ma'wēçxáawa yūuçxa ikhya' ājāwala'ja's pakwetx. Nawa isa ikhya' yu' ūukhtxi, nasa thaakwe kuhsa yu' Jesus kaapiya'l'jni's nwēesē'l'saçxaçxáa ūspa'ga. <sup>19</sup>Txajū' jxuka çxhi'dxiçte', Jesusa' txāa çxhabuh kasehna u'kh.

### Higwera fxtūu tasx udxni

(Mt 21.20-22)

<sup>20</sup>Kuskuskhē kusí kxuy jxkhēuuççxa', higwera fxtūu tasxa' weçete pa'l'j udxni ūstetx uy. <sup>21</sup>Açá' Pedro' Jesus we'weni's yajkxçxa na'l'jīk:

—Mtheg naa higwera fxtūu tasxa's jū'na we'weçxa': naa fxtūu tasxte yūnni's kim yuhwa ū'meetxna peena yu' jīnag we'we txāa fxtūu tasxa' jxuka uhdxga jīte', <sup>22</sup>Jesusa' na'wēk pas:

—I'kwe'sxa' kīh pēyiççxawa, kuh jwed yajkxmée Dxusa' kxtey yuuna sūhnaçxáa mpējxwe. <sup>23</sup>Adxa' isath we'we': maawa Dxusa's txā'wē ūusuh

jxuka yajkxna, naa vxiç wala ayjxu u'ljçxa ìkh walate me'l' khēeya' jìtxna aça' kxtey yuuna. <sup>24</sup>Kxtey yuuwa'ja's adxa' jiiçxath txā'wē i'kwe'sxtxi' Dxus yakh puutx we'wekaja' pēyni's jxpa'gayā'tha'w sūhna. <sup>25</sup>Sa' Dxus yakh puutx we'wena ūsī yaakiwá'kwe vxitesa yakh āhmée yūuni's. Sa' txā'wē yajkxçxa', txāa yakh peltunāyya' u'lwene'kwe, kxah i'kwe'sx Tata cielutewe'sxwa i'kwe'sx pkaltxi peltunaīna. <sup>26</sup>Nawa i'kwe'sx txā'wē vxitesa yakh āhmée yūuni's peltunaīmeete', i'kwe'sx Tata cielutewe'sxwa i'kwe'sx pkaltxi' peltunaīmeena jìk.

### Dxuus yatte Jesus juuna' yūuni's pēyni

(Mt 21.23-27; Lk 20.1-8)

<sup>27</sup>Txajū' Jerusalte sxawedna pa'ljçxa, dxuus yat-su u'ljute', sacerdote npiçthē'jwe'sx vxite' Dxus leya's kaapiya'jsawe'sx vxite' judiu nthē'jsawe'sx Jesus tasxte utxaaçxa', <sup>28</sup>na'jīnatx pējx:

—Idxa' çkimga saga dxuus yatte txā'wē juuna' yūu? çKimga txā'wē yūuya' jxkaah? jīte', <sup>29</sup>Jesus paççxa':

—Adxwa i'kwe'sxtxi' pējx ya'wath aça' adx pēyni's pasune'kwe. Txā'wē yū' adxwa pta'sxi'nja kim jxkaathe txā'wē yūuçxawa. <sup>30</sup>Sa' pējxku na'jīna:

—Juan Bautista's çkimga jxkaah bautisāyya'? çDxusá', meeçxa' naa kiwega piçthē'já'? Mpaaswe jīnak pējx.

<sup>31</sup>Txajū' txāawe'sx pwe'sx na'jīnatx puutx we'we':

—Dxusne' jxkaah jī'nja'w aça' txā'wēte' çmjīya'kwe Juan pta'sxni's jxpa'gamée? jīna pasuna. <sup>32</sup>Meeçxa' naa kiwetewe'sxne'ta jxkaah jīwaçwa, kxul yuhna, nasa jxukaysa Juana's we'weçxa': Dxus jxkaahnisa' jī'tx. <sup>33</sup>Txā'jīna ūukh we'weçxaçxáa:

—Kwe'sxa' jiimeetha'w jīnaçxáatx Jesusa's pas.

Aça' Jesusa' na'jīk:

—Adxwa pta'sxme'nja kim jxkaathe txā'wē yūuçxawa jìk.

### Mjīisawe'sx patron nçxi'ka's ikhni yakh kaaja'daljni

(Mt 21.33-46; Lk 20.9-19)

**12** <sup>1</sup>Txajū' Jesusa' naa ejemplo yakhku kaaja'daljna pta'sx: —Teeçx piçthē'ja' txajx kiwete uwa wala uhçxa, ktadxīi jxuka uphku, sa' uwa ee thegwa'l yatwa txahçxa uwa thē'the ūhdeçxa ku'swal' yatwa fxii txajk. Txā'wē yūuçxak txāa kiwete mjīiwa'jsatx ew neewe'wena nvxihtçxa jxu'l kiwen u'j. <sup>2</sup>Txajū' uwa thē'ljwa'l en āhte', txā'sna selpisáa teeçx kaakh kxtee mjīisatx pējxya' txāa jīi yuuwa'ja's. <sup>3</sup>Nawa txāa kiwete mjīisawe'sxa' pējxna pa'lja's uweçxa wala pkxuutx, sa' kīh yuhwa dukhmeetx kaah. <sup>4</sup>Aça' kiwe namu' vxite selpisáa ki' kaakh txā'snawa wala wēesxuna kwet wāatātāhna dxikthesu kpā'vxittxi. <sup>5</sup>Txajū' kiwe namu' ki' kaakh vxite selpisáa, aça' txā'sa' ikhtxi. Txāa e'su'

maazkuēe selpisaawa kaakh, aça' txāawe'sxtxi' maafi yuutxi' kpā'vxitna, vxitetxi' ikhtxi.

<sup>6</sup>Txā'wē yūute!, teeçx nçxi'k wala wedxnisa ji'phuk txā'snak nmehte kaah, adx nçxi'ka's pejka nwēesē'jetxna sūhna. <sup>7</sup>Nawa txāa kiwete mjūsawe'sxa' txāa nçxi'ka's uyçxa!: Naa nçxi'k txā'wē naa kiwe's uwewa'jsana, aça' txā'sa' ikhçxa kiwe's kwe'sx iiyamu'nja'w jīnatx puutx we'we. <sup>8</sup>Sa' txāa nçxi'ka's uweçxa ikhçxa uunfi kakwe's txāa kiweju kutxi'jtx jīnak pta'sx.

<sup>9</sup>Txā'wē pta'sxçxa Jesusa' pējxku:

—Txā'wē yūute!, kxtee kiwe namu' çkīh yūuix? Txāa sxawedna pa'lçxa, kxtee mjūsatxi's ikhçxa kiwe's vxitetx ūsuna sūju'th jīk.

<sup>10</sup>Dxus librute na'wē fxi'jni ūsa' txā'sa' iilēymeewá'kwe i'kwe'sxa':

Yat txaahsawe'sxa': Naa kweta' seelpime! jīçxa wāatāhtx.

Nawa txāa'ik yat makwesana çxhāçxha neewewa'jsa yuuna pa'l.

<sup>11</sup>Txā'wē neewewa'jsa yuuna pa'l'jwa'ja's Dxusku vxitçxa nvxiht,

Txāa pa'ga kwe'sx yakha' wala weçxa yuja' çjī'çmeena'?

<sup>12</sup>Txajū' Dxus leya's kaapiya'jsawe'sx vxite' sacerdote npiiçthē'jwe'sxa' txāa ejemplo' txāawe'sxtxi' we'wenitewa jiyuçxa', Jesusa's uweçxa tud wēetx. Nawa nasatx ūukhçxa tudmēe ul'jtx.

### Gobierno's dukhwa'ja'swa pēyni

(Mt 22.15-22; Lk 20.20-26)

<sup>13</sup>Txajū' fxariseowe'sx vxite' Herodes nasa txāawe'sxtxi' pa'yaçxatx maz kaah Jesus tasxte, kīh ewmēe we'wetewa kpajkxya'. <sup>14</sup>Aça' txāawe'sxa' na'wētx paapējx Jesusa's:

—Idxa's kwe'sxa' jiitha'w. Idxa' isasaçxá'sgu we'we!, Dxus tasxte pa'l'jwa'l dxi'ja's kaapiya'jna. Sa' nasaa jxkaahna yu'kxpehnix nwēese'je'çmeeg, txāa pa'gatey idxa' nasa ewsa na'wē thegsatx jiyumey ju'gu yu'çmeeg. Idx çma'l'jiki'g? Jxkaahsa Cesara's vxxy dukhte çewmanx? Meeçxa' dukhmeete wāa çewna? jīna pējxte', <sup>15</sup>Jesusa' txāawe'sx ūuste ewmēe yajkxçxa txā'wē pēyni's jiyuçxa', na'wēk pas:

—çKijxa'kwe adxa's ewmeete nvxiit wēeçxa txā'wē pēyī'? Vxyu's mneejxūhwe wakx, thegya'wath jīte!, <sup>16</sup>teeçx vxxy's jxūna kūhtx, aça' thegçxa' na'l'jīk:

—Ayte! çkiim dxi'pa's ki'pnina, sa' kiim yase's fxi'jnina? jīte!, txāawe'sx pasçxa':

—Cesar dxi'pa's ki'pçxa Cesar yase's fxi'jni' jītx.

<sup>17</sup>Aça' Jesusa' na'wēk jxkaah:

—Cesar jī's Cesara's dukhwa'ja', sa' Dxus jī's Dxusa's dukhwa'ja' jīte', paapēysawe'sxa' pasya' ājāmēe kuh yajkxnatx neeyūu.

### Uusaawe'sx ki' itxi yuwa'ja'swa pēyni

(Mt 22.23-33; Lk 20.27-40)

<sup>18</sup>Txajū' saduceowe'sxtxi' paapējxya' kūh Jesus tasxte. Txāawe'sxa' uusaawe'sxa' peena yu' itxi' yuumeetxna sūhna yaakxsatx yu'. Sa' Jesus tasxte kūhçxa', pējxtxi:

19—Idxa' jiine'ga, Moisesa' na'wēk fxi'jçxa nvxiht: Maa piçthē'jwa nyu ji'phçxawa, luuçx ji'phumey uute!, uusáa nyakha' txāa neeyūsáa u'y yakh kabaana açá' txāate luuçx nyafxtewe'sxa' uusáa nçxi'k na'wē neeyūuna jīnak fxi'j.

20Kwe'sxa' jiitha'w siete piçthē'j pxakhtxi u'p yu!. Sa' nyakh nthē'jsa' iyyuuçxawa luuçx ji'phumey uuk. 21Aça' nyakh e'stewe'sxa' txāa u'y neeyūsáa yakh kabaçxawa, txāawa luuçx ji'phumey uuk. Sa' tekhtewe'sx nyakhwa txāa u'y neeyūsáa' íçxáak kaba. Nawa txāawa txā'wēyçxáak yuu. 22Aça' sietesay teeçx u'ysaçxaçxáana kabana jxā'jçxawa, txā'wēçxaçxáatx yuu. Nmehte! txāa u'ywa uuk. 23Aça' uusaawe'sx ki' itxí yuu ente!, txāa u'ya' çmaa yakh isa nyu yuuwa'jsakx cielute'? jīnatx paapējx. 24Aça' Jesusa' na'wēk pta'sx:

—I'kwe'sxa' Dxus libru's jiimee'i'kwe, sa' Dxus tasxte ma'wē fxi'zewa'ja'swa jiimeeçxa' jxpubana ūsi'kwe. 25Nawa uusaawe'sxa' ki' itxí yuuçxa', nyu ji'phuwa'jsa meeta!. Kxte! kaaptamu'jna ūskiweme!, txāa pa'gatey cielute! txāawe'sxa' angeleswe'sx na'wēsaxçáa yā'tha!. 26I'kwe'sxa' jxpubanuwe: Uusaawe'sxa' ki' itxí yuuwa'jsa yuhta!. I'kwe'sxíwa Moises libroute ilēeyne'kwe: Kxte! çhūçh yu'kh behna ūsni pxājū na'wēk Dxusa' we'we: Adxa' Abrahan, Isaak, Jakob txāawe'sx Dxusthu jīk. 27Dxusa' uusaawe'sx Dxusme!, txā' itxisawe'sx Dxusa!. Aça' i'kwe'sxa' wala jxpubana ūsi'kwe jīk.

### Dxus ley maatewa jxthaakwesa

(Mt 22.34-40)

28Txā'wē pāapējxte!, Jesus sxiigmée pasuçte wēsē'jna ūsu'k Dxus ley kaapiya'jsa teeçxsa!. Sa' txāawa na'wēk pējx:

—Dxus leya' maatewa jxthaakwesa' çmaana? jīte!, 29Jesusa' pta'sxku:

—Dxus ley maatewa jxthaakwesa nyafxtewe'sxa' na'wē!: Israelwe'sx, mwēesē'jwe: Kwe'sxtxi taki'sa Dxusa' teeçx yuuçxá!. 30Txā'sa' ūusuh jxuka yajkxçxa txāa yuuçxáana selpiina fxi'zewa'ja' bagaçxte yuhwa txutemée uu entepkaçx. 31Aça' e'stewe'sxa' txā'wēydxí'a!: Peekíi ma'wēga ya'peeygāja!, txā'wēy mpeeygāh vxite nasatxwa. Naa ley e'zsa maatewa jxthaakwesata! jīte!, 32Dxus leya's kaapiya'jsa pasçxa!:

—Ew yuh pta'sxgu. Dxusa' teeçxçxáa yuh ūsa!, açá' vxite Dxus yu' meeta!. 33Sa' txā'wē ūusuh jxuka yajkxçxa txāa yuuçxáana bagaçxte yuhwa txutemée selpiina fxi'zeçxa, txā'wēy ma'wē peekíi ya'peeygāja'kx txā'wē vxite nasatxwa peeygāhna fxi'zeni! Dxusna peesna maazkuēe niimalwa altalte kabnite jxthaakwe ewsa' jīk.

34Txajū! Dxus leya's kaapiya'jsa txā'wē jxpa'yakx paste!, Jesusa' na'jīk:

—Dxus jxkaahnite u'kaya' utxa ūsgu jīk.

Aça' txajūyā'ja' vxite yu' peena pējxmeeta!.

### Dxus tasxu yuusa' çkiim nçxi'kki? jīna Jesus pēyni

(Mt 22.41-46; Lk 20.41-44)

35Txajū! Jesusa' dxuus yatte nasatx kaapiya'jna na'wēk pta'sx:

—Dxus ley kaapiya'jsawe'sxa' çma'wēteki'tx Kristo' Davxid nçxi'ka' jīna pta'sxi'? <sup>36</sup>Naapkaçxha' Dxus Espiritu kaayaki'the' Davxida' Kristo's we'weçxa' na'jīk:

Adxna jxpe'jsa Kristo's Dxusa' na'jīk:

Adx pukate paçu ju'gte mkaaçx,

Idxna açesatx idxçxaçxáana nwēese'jwa'ja's vxitna jxā'phkaçx jīk. <sup>37</sup>Aça' Kristo' çma'wēçxa Davxid nçxi'k yuukx? Davxid íwa Kristo's we'weçxa': Adxna jxpe'jsa jīk. Txā'wē Jesus pta'sxte', nasa txazkuēesay wala weçxana wēsē'je'tx.

### Ley kaapiya'jsawe'sxtxi yuuwesa Jesus nvxiitni

(Mt 23.1-36; Lk 11.37-54; 20.45-47)

<sup>38</sup>Txajū' Jesusa' na'wē yu'kxpehnaak kaapiya'j:

—Dxus ley kaapiya'jsawe'sxtxi' jxpa'yakx me'juwe. Txāawe'sxa' ropa jxu'jsa athçxatx nasatx weçxaa jxthāasna pekūju' msuuwa.

<sup>39</sup>Sa' judiuwe'sx pkhaakhenisuwa kaçxni wejx ewsaçxáanatx pakwé', vxite' sālīya' pi'kxni yat-suwa txā'wēytxi yu'. <sup>40</sup>Sa' vxiudawe'sx kīh ji'phuni'swa jxuka kusa'jçxatx txāa pesweni's kaapeçxkana'jya' wala jxu'j we'wena lisá'. Txā'wē yūupa'ga txāawe'sxa' wejx jxthaakwe Dxus kastigāyñi yuutxna jīk.

### Vxiuda ofxreda akhni

(Lk 21.1-4)

<sup>41</sup>Sa' Jesusa' dxuus yatte vxyu āsxni dxi'pte kaçxçxa thegnak u'pu' ofxreda āsxya' kūusatx. Aça' maafí yu' vxyu wala ji'phsa' seena' wala akhetx. <sup>42</sup>Naapkaçxha' teeçx u'y vxiuda puuplesa kūhçxa', e'z vxyuu musxkuēçxáak akh. <sup>43</sup>Aça' Jesusa' txāa yakh u'jusawe'sxtxi pa'yaçxa na'wēk pta'sx:

—Naa u'y vxiuda' kīh yuhwa ji'phmeesaçxawa maa maatewa jxthaakwek akh. <sup>44</sup>Vxite yu' akhe'tx, nawa txāawe'sx peejinimée kijxasaçxáanatx akhe'. Nawa naa u'ya' kīh yuhwa ji'phmeesaçxawa txajx ũ' weywal'ja's jxukak akh jīnak pta'sx.

### Dxuus yat pçuwa'ja's Jesus pta'sxni

(Mt 24.1-2; Lk 21.5-6)

**13** <sup>1</sup>Txajū' Jesusa' dxuus yatu kasejeçte', txāa yakh u'jusa teeçxsa' na'jīnak we'we:

—Mtheg, naa yata' na'wē seena' wala txaahni' kwet zhiçxkwesa yakh jīte', <sup>2</sup>Jesus pasçxa':

—Naa yat wala's wá'ga thegu', aça' txā'wē yuja'. Nawa jxuka pçuuna, aça' teeçx kwetçxáa yuhwa kēese'jnimeesa yu' neeyūumeena jīk.

Naa kiwe pçuwa'j en ājaçte seena'sa vxyaawa'j  
(Mt 24.3-28; Lk 21.7-24; 17.22-24)

<sup>3</sup>Sa' txajū kasehçxa', Oliwos thā'j dxuus yat dxi'ptek neeyū' kxteetx u'j. Kxtee pa'ljçxa Jesusa' kaççxa u'pte', Pedro, Jakobo, Juan, Adres txāawe'sxa' na'wētx paaçte pējx:

4—Bagaçx txā'wē dxuus yata' pçuwa'jsaxx txā'sa' pta'sxwaça', sūju'tha'w. Sa' txā'wē yuua'j en ājāçte', çkīhçxa yuuxk? txā'snatha'w jiyu wējē' jīte', <sup>5</sup>Jesusa' pta'sxku:

—Mpa'yajkxwe kaypuba'jwe'sxte. <sup>6</sup>Txā'wēme', wala kasejetxna: Adxiī Kristoth jīna. Txā'wē yūuçxa maai' yuutxi' wala kaypuba'jatxna.

<sup>7</sup>Sa' i'kwe'sxa' wēsē'jene'kwe gweçxa u'pa' sa' aysuwa gweçxa pa'jana jīni's, nawa ūkhmeene'kwe. Txā'wē kxtey yuuyujuna, nawa nmeh en meea'. <sup>8</sup>Aça' gobiernu' vxite kiwete gobiernu' yakh puutx puiitxna. Naapkaçxha' puutx jxu'j kiweju' pwe'sxwa puutx puiitxna. Mtee mteewa seena' ehd u'jwena. Seena' wējē enwa pa'jana. Sa' nasawa wala susutxna gobiernotx açewe'wena. Nawa pxthaa nxuswa'j en takhnaçxāa txā'wē yuuna.

<sup>9</sup>Nawa i'kwe'sxa' jxpa'yakx meswe. Txā'wēme' judiu nthē'jsawe'sx kusete i'kwe'sxtxi dukhçxa, txāawe'sx pkhaakhenite nuypa'ljçxa pkxuutxna. Sa' i'kwe'sxa' adxna selpiiya' utxaapa'ga ahççxa ne'jwe'sx tasxsu vxite' jxkaahsa tasxsu kuutxa'jni yuune'kwe. Txā'wē kxsū pa'ljçxa', jxkaahsawe'sxtxiwa pta'sxya' ājāne'kwe adx kaapiya'jni's. <sup>10</sup>Nmeh en utxaaçte', Dxus yuwe ewte nvxiitwa'jsa's mtee mteewa jxuka pta'sxni yuuna.

<sup>11</sup>Txā'wē i'kwe'sxtxi' jxkaahsa kusete dukhya' jxūna u'the', çma'wē pasukxtha'w? sūhna kuh yaakxnuwe ūkhna. Dxusa' txāa dudte kaaūusuthe'jena txā'sçxāa mwe'wewe, txāa pa'gateg i'kwe'sx we'wewa'jsamee'kwe. Dxus Espiritu i'kwe'sx ūuste kaayaki'jwa'jsa' i'kwe'sx we'wewa'ja's, aça' txā'sçxāa we'wewa'jsai'kwe. <sup>12</sup>Naa kiwete nasa' peekx nyakhtxi ahççxa kiikhel'jetxna, aça' neywe'sxwa peekx nçxi'ktxi ahççxa kiikhel'jetxna. Txā'wēy nçxi'kwe'sxwa neywe'sxtxi ahççxa kiikhel'jetxna. <sup>13</sup>I'kwe'sxa' adxna selpiipa'gaçxāa naa kiwetewe'sx jxuka yaaçeni fxi'zene'kwe. Nawa uu entepkaçx Dxus yakh txutemée fxi'zeçxa', ewte neeyūune'kwe.

<sup>14</sup>Na'wē fxi'jni's jiyuya' jxpa'yakx mlēeywe: Dxus yuwe pta'sxsa Daniela' fxi'kh dxuus yatte kazx ewmēe yuuna pa'jwa'ja's. Aça' txā'wē kxtey yuuçte uyçxa', Judea kiwete ūssa nasa' çxhab peeku'j yu'khsuçxaçxāa ūphna kasejene'kwe. <sup>15</sup>Aça' txā'wē seena' yuuyçā'the', ēe yat-su u'psa ūphna sa'ljçxawa, kīh yuhwa kutxi'ljwa'j en jil'phumeetxna. <sup>16</sup>Txā'wēy mjū ehsu u'ljusawa txajx atxhçxā'swa yatuh kutxi'jya' pa'jwa'j en jil'phumeetxna. <sup>17</sup>Txāa ensu' nasa jil'phsa vxite' luuçx āpākuē jil'phsa' wala yuh nxus pxthaa yuutxna. <sup>18</sup>I'kwe'sxa' Dxusna mpi'kxwe,

txã'wẽ ùphwa'l' ena' nus ente yuukahmén. <sup>19</sup>Txã'wẽme' iiméh seena' wala nxuswa'l' en yuuna. Naa kiwe's Dxus pheu'jiyna, bagaçxte yuhwa nxuswa'l' en txã'wẽsa yu' u'pu'çme', sa' txãa skhẽwniijũyã'ja' bagaçxte yuhwa txã'wẽy nxussa yu' u'pumeena. <sup>20</sup>Kwe'sxtxi taki'sa Dxusa' txã'wẽ seena' nxuswa'l' ena's txaçxmée vxitmeete yu', naa kiwete nasa kim yuhwa itxi neeyũumeetxna. Nawa txã'wẽ seena' nxuswa'l' en u'puwa'ja's Dxusa' txaçxmeeek vxit txajx nasa txhitxhnisatx peeygãhçxa.

<sup>21</sup>Txajũ' maáí yu' i'kwe'sxtxi na'ljĩtxna: Myuhwe thegya', Kristo' ayte ũsa' jĩtxna. Meeçxawa: Me'jwe thegya', Kristo' kxtee ũsa' jĩtewa, i'kwe'sxa' kxtey yuunuwe. <sup>22</sup>Txãa ensu' wala isxiisa kasehçxa: Kristotha'w jĩtxna, naapkaçxha' vxite': Kwe'sxa' Dxus yuwe pta'sxsatha'w jina pekũjũtxna, kaypuba'l' wẽeçxa kĩkĩhwa kaavxya'ja'jna. Jxpa'yakxmeete', Dxus txhitxhnisa yuhtxwa kaypuba'jatxna. <sup>23</sup>Aça' txã'wẽ yũuwe'sxte, adxa' dxiiikhẽy pta'sxiçĩthu i'kwe'sx jxpa'yakx ũskahn.

### Dxus Nçxi'k Nasa Yuusáa seena' zhiçxkwe vxyaana

(Mt 24.29-35, 42-44; Lk 21.25-36)

<sup>24</sup>Nawa txã'wẽ nxusni en skhẽwniijũ', seka' çxhi'dxina, aça' a'tewa kweethmeena. <sup>25</sup>Naapkaçxha' estrelxa' cielujũ ũsxĩtxna, aça' kĩkĩhwa seena' walasa êe walate ũstxna txãawa jxuka kãese'l'ni yuutxna. <sup>26</sup>Txã'wẽ yũunijũ', Dxus Nçxi'k Nasa Yuusa's uyuutxna tãaph pxãhte seena' zhiçxkwe kweethna kijaçte. <sup>27</sup>Sa' kĩhçxa' txajx angeleswe'sxtxi jxkaajana txajx nasa txhitxhnisa mtee mteewa ũstxna txãatx jxuka pkhakhkahn.

<sup>28</sup>Naa ejemplo's peçxkananuwe: higwera fxtũu taxs u'se yeeçũte uyçxa', jiyu'i'kwe yũnya'watewa. <sup>29</sup>Txã'wẽy na'wẽ pta'sxthu txãatx uyçxa', jii mfxi'zewe nmeh ena' utxaaçna sũhna. <sup>30</sup>Isath we'we': txã'wẽ seena' nxuswa'l' ena's uyuutxna naa ensu nasa uume'y. <sup>31</sup>Cielu naa kiwe jxuka skhẽuutxna, nawa adx we'weni' jxuka kxtey yuume'y yu' skhẽwmeetxna. <sup>32</sup>Nawa txã'wẽ Dxus Nçxi'k kĩh orate kũwa'jsatewa, txãa en yu'sa' kim yuhwa jiimeeta' cielute Dxus angeleswe'sxwa jiimeeta', aça' Dxus Nçxi'k íi yuhwa jiime', naasáa Dxus yuuçxáa jiia'.

<sup>33</sup>Txãa pa'ga i'kwe'sxa' wala jxpa'yakx meswe, Dxusna yuuçxáa neewe'wena. Txã'wẽme' jiimeei'kwe bagaçx kũwa'jsatewa. <sup>34</sup>Txã' na'wẽ yuuna: Teeçx piçthẽ'l' jxul' kiwen u'l'jweççxa', yatu kasehmey selpisaatx teeçxsa na'wẽçxah mjii ũsçxa kxtee jxpa'yakx ũskahn teeçx thegwa'jsa txajana. <sup>35</sup>Txã'wẽy i'kwe'sxwa wala jxpa'yakx meswe. Txã'wẽme' jiimeei'kwe çxhi'dxiçte ma'k yuu, meeçxa' kuspxãh atalx we'weçte ma'k yuu, meeçxa' kusíi ma'k yuu nawa pa'lçxáa yuuna. <sup>36</sup>Txã'wẽme' yajkxmée ũsiyna, naa dudte pa'lçxáa wáa yuuna. <sup>37</sup>I'kwe'sxçxáatx pta'sxmée, jxukaysatxthu pta'sxi' jxpa'yakx ũskahn.

### Jesusa's ikhwa'ja's puutx we'weni

(Mt 26.1-5; Lk 22.1-2; Jn 11.45-53)

**14** <sup>1</sup>Paskua's ũ'ni vxite' pan lewadura ji'phmée ũ'ni fxiesta txãa e'z fxiesta ajxa' e'z ençxáak peejx yu'. Txãa ente Dxus leya's

kaapiya'jsawe'sx vxite' sacerdote npiiçthê'jwe'sxa' puutx we'wetx ma'wê yūuçxa kimwa jiyunimeete Jesusa's kiikhe'jya' ājāwa'ja's. 2—Nawa fxiesta entemée kiikhe'je'nja'w. Txā'wēme', nasa wala susutxna jīnatx puutx we'we.

**Wēt putasá pa'gasa's teeçx u'y Jesus dxikthehê awni**  
(Mt 26.6-13; Jn 12.1-8)

<sup>3</sup>Naapkaçxa' Jesusa' Betaniate Simon wā'jy weeju katxhisa yattek u'p yu'. Aça' kxtee u'pte', teeçx u'y wēt putasá kih yuhwa ka'dnimeesa wala pa'gasa's atçxak kūh. Sa' fxrasko's uhdçxa Jesus dxikthehêk aw. <sup>4</sup>Aça' kxtee ūssa' maafí yu' ūusaçxatx txāawe'sx pwe'sx na'jīna:

—¿Kīh yūupa'gaçxáaga naa wēt putasá txakwe pa'gasa's kxul psuwú'?

<sup>5</sup>Wejx yuwa trescientos pesote txweyçxa puupletx pu'çxya' ewne' yu' jīnatx txāa u'ya's ahçena wēesxū.

<sup>6</sup>Aça' Jesusa' na'jīnak we'we:

—¿Kījxa'kwe wēesxú'? Kuçx yuunuwe. Na'wê yūuk txā' kxul vxituni yuume'. <sup>7</sup>Puupletx peeswaç ewne' yu' jī'i'kwe na' puuplesatxi' bagaçxtewa peesya' ājāne'kwe, i'kwe'sx yakh nes yuutxna naa pa'ga. Nawa adxa' i'kwe'sx yakh nes yuuya'wameeth. <sup>8</sup>Adx uute adx kakwete sxūsxwa'ja's ma'wēçxáawa yūuk adx uumeyna. <sup>9</sup>Isath we'we', naa kiwete mtee mteewa Dxus yuwe's pta'sxna pekūhsa', naa u'y txā'wê yūuni'swa ja'da pta'sxni yuuna peçxkanamée jīk.

**Jesusa's preesu'jwa'ja's Judas dukhya' neeyūuni**  
(Mt 26.14-16; Lk 22.3-6)

<sup>10</sup>Txajū' txāa yakh u'jusa teeçxsa Judas Iskariote' sacerdote npiiçthê'jwe'sx kusete Jesusa's dukhya' puutx we'weya' u'kh. <sup>11</sup>Aça' txāawe'sxa' wala weçxana vxyu dukhya' neeyūutx. Txajū' Judasa' ¿ma'wê yūuçxa Jesusa's açesawe'sx kusete dukheki'th? sūhna wala yajkxku.

**Jesusa' docesawe'sx yakh nmeh ū'ni**  
(Mt 26.17-29; Lk 22.7-23; Jn 13.21-30; 1 Ko 11.23-26)

<sup>12</sup>Pan lewadura jī'phmée ū'ni fxiesta en ājāçte', Paskua'jwa'j piisxaatx ikhe' txāa ente' txāa yakh u'jusawe'sxa' Jesusa's pējxtxi:

—¿Paskuatewe'sxa's ū'ya' mtee pheu'jya' kaajxa'waga? jīte', <sup>13</sup>txāa yakh u'jusawe'sx e'zsatx na'wēk jxkaah:

—Me'jwe Jerusalenna. Sa' kxtee teeçx piçthê'j uyuune'kwe yu' mitxha's yakhçxa u'jweçte. Sa' e'stey u'jwene'kwe, <sup>14</sup>aça' txāa mtee u'kate', i'kwe'sxwa kxtee u'kaçxa yat namu's pēyine'kwe: ¿Mtee piesa ūsuki'g Paskuatewe'sxa's pheu'jçxa adx yakh u'jusawe'sx yakh ū'wa'ja's? jīnak kwe'sxtxi jxpe'jsa' yuwe kaah jīne'kwe. <sup>15</sup>Aça' txā' pta'sxina ēe yatte teeçx piesa walasa pheu'jniyā'jsa. Kxtee Paskuate ū'wa'ja's pheu'june'kwe.

<sup>16</sup>Txã'wě jxkaathe', txãawe'sxa' çxhabna u'jçxa' Jesus ma'wě jxkaahni's jxuka kxtey uyçxa', Paskuate ũ'wa'ja's pheu'jtx.

<sup>17</sup>Jxuka çxhi'dxiçte', Jesuswa kxtee pa'kh txãa yakh u'jusawe'sx yakh.

<sup>18</sup>Sa' mesate ũ'na u'pçxa', na'jîk:

—Isath we'we', ayte adx yakh ũ'na u'psa teeçxa' adxa's açesawe'sx kusete dukhya'wa' jîte', <sup>19</sup>jxukaysa nxus we'wena puutx ya'paapëyî'tx:

—Meeçxa' çadx wáa txã'wě açesawe'sx kusete dukhwa'jsane'tka? jînatx jxukaysa txã'wěçxaçxáa we'we'.

<sup>20</sup>Aça' Jesusa' pta'sxku:

—Adx yakh u'jusa teeçxa' maa txã'wě adx yakh ja'daçxah kuse's plaatukhë akhena txãa adxa's açesawe'sx kusete dukhwa'jsa'. <sup>21</sup>Dxus Nçxi'k Nasa Yuusa' ma'wě uuwa'jsatewa Dxus librute pta'sxi'k txã'sa' kxtey yuuyujuna. Nawa adxa's açesawe'sx kusete dukhsa' seena' yuh nxuste khëjena. Txãa piçthë'ja' wejx yuüwa naa kiwete kasehmeewaçne' wejx ew yu' jînak we'we.

<sup>22</sup>Nee ũ'na u'pîi, Jesusa' pana's jxpa'gaçxa Dxusna weçxana'wa pe'ltedeçxa ũsu'sku na'jîna:

—Më'we, naa pana' adx kakwe na'wësa' jîçxa', <sup>23</sup>waso'swa jxpa'gaçxa Dxusna weçxana'wa jxukaysatx tudxkaathe', jxukaysa tudtxi txãa wasotewe'sxa's. <sup>24</sup>Aça' Jesusa' na'wëk we'we:

—Naa wasotewe'sxa' adx ee na'wësa', maazkuëesatewa ãh uüwa'jsa'. Dxusa' txã'wëk adx eea's pkawçxa yuuçxáa i'kwe'sxtxi nwe'wewa'ja's nvxiht u'se pheu'jçxa. <sup>25</sup>Isath we'we': Açxhüyã'ja' peena yu' tudxme'nja naa uwa yu'a's, naasáa Dxus jxkaahwa'j ente yuuçxáa ki' tudxi'nja.

### Pedro ïsxiiwa'ja's Jesus pta'sxni

(Mt 26.30-35; Lk 22.31-34; Jn 13.36-38)

<sup>26</sup>Txajü' Dxusna weçxana memçxa', Oliwos vxiçna u'jtx.

<sup>27</sup>Kxtee pa'jçxa', Jesusa' na'wëk pta'sx:

—Dxus librute we'weçxa': piisxáa-thegsa's ikhte', piisxá' jxuka ũphuutxna jî'k txãa pa'ga naa kuste' i'kwe'sxa' adx tasxu jxuka ũphuune'kwe. <sup>28</sup>Txã'wě yuutewa, adxa' ki' itxi yuuçxa i'kwe'sx yaçte u'jwe'nja Galilean jîte', <sup>29</sup>Pedro pasçxa:

—Vxite yu' makwe ũukhçxa ũphtewa, adx yu' txã'wě yüume'nja jîk.

<sup>30</sup>Aça' Jesusa' na'wëk pta'sx:

—Idxa's isath we'we', naa kuste atalx e'z us we'wemeyna, tekx us ïsxîjaç yuune'ga adxa's jiimeeth jîna. <sup>31</sup>Txã'jîtewa, Pedro' jweeíçxáak çxhãçxa we'we':

—Makwe idx yakh ih uune'jçxawa, idxa's jiimeeth jîna yu' ïsxîime'nja jîte', jxukaysa txã'wěçxaçxáatx we'we.

### Jesusa' Geçemanite Dxus yakh puutx we'weni

(Mt 26.36-46; Lk 22.39-46)

<sup>32</sup>Txajü' teeçx ahte pa'jtx, Geçemaní yaasesate. Sa' Jesusa' txãa yakh u'jusawe'sxtxi:

—Ayte me'pwe, naapkaçxha' adxa' Dxus yakh puutx we'weya' u'ljweçthu jïçxa', <sup>33</sup>Pedro, Jakobo, Juan txāawe'sxçáatx pe'ljçxa u'kh. Txajü' Jesusa' wala nxus yajkxçxa', <sup>34</sup>na'ljïnak pta'sx:

—Txakwe wala pxthaa yuuçxa uuwa'ja's yajkxte!, wala nxus yuja'. Aça' i'kwe'sxa' ayte dehmée me'pwe jïçxa', <sup>35</sup>jxu'ljmeekuē u'ljçxa kiwega pkipha weteçxa Dxusna pëjxku txā'wē seena' yuuçxa uuwa'ja's yu'pthejkahn na'ljïna: <sup>36</sup>Tata, idx yakha' kīh yuhwa thēysa yu' meea'. Aça' txā'wē seena' nxuste uuwa'jū meen nwe'we. Nawa adx jxthāasni's kxtey yuumeēçxawa, iidx jxthāasniçxá's kxtey meen yūu jik.

<sup>37</sup>Txajü' Jesusa' txāa tekhsatx thegya' kūhçxa', dehna ūstek uy. Sa' Pedro's we'wek:

—Dehmée u'pkaathe', çteeçx oraçxáawa itxī u'pmée dehwá'ga? <sup>38</sup>Ewmeete weteya'mée, Dxus yakh puutx we'wena me'pwe dehmée. I'kwe'sxa' ūsuh yu' çxhāçxhai'kwe yaaki', nawa kakwe yu' çxhāçxhaçme' kxtey yuuya'.

<sup>39</sup>Txajü' ki'kin Jesusa' u'ljçxa', txā'wēyçxáak we'wena Dxus yakh puutx we'we'. <sup>40</sup>Sa' thegya' ki' sxawedçxa', txā'wēy deeni ūstek uyna kūh, txāawe'sx yafxa' dee wēeçxa çxhāçxhaçmeene'ta naa pa'ga. Txā'wē Jesus uyna kūhte, ma'wē pasya' yuhwa ājā'çmeeta'.

<sup>41</sup>Txajü' tekx uswa txāawe'sxtxi thegna kūhçxa', Jesusa' na'ljik:

—Āçxh yuuçxá' jxkaaseya' mdejxujíwe. Nawa āçxha' pejka en ājk, Dxus Nçxi'k Nasa Yuusa's ewmeesawe'sx kusete dukhwa'lj. <sup>42</sup>Txā'wēyā'ja' aça' kiiteçxa mejkawe. Adxa's açasawe'sx kusete dukhwa'jsa' yujxā'ja' jik.

### Jesusa's preesu'jni

(Mt 26.47-56; Lk 22.47-53; Jn 18.2-11)

<sup>43</sup>Kxtee we'wena nee ūsiyna, Judasa' kūjk. Txāa yu' Jesus yakh u'ljusa docesatewe'sxíçxáak yu', aça' txāa Judas yakh nasa wala kūhtx kçxilx fxtü txā'wē atçxa. Txāawe'sx yu' Dxus leya's kaapiya'jsawe'sx vxite' sacerdote npiičthē'jwe'sx vxite' judiu nthē'jsawe'sx jxkaahnitx yu'. <sup>44</sup>Judasa' Jesusna uwewa'jsatx na'wēku'ga yu'kxwe'weçxa pe'ljna yuwé': Ma'sna dxi'pte weçxa'nja txā'sna i'kwe'sxa' tudçxa jxūna u'ljwene'kwe jïnaga yu'kxwe'we.

<sup>45</sup>Txajü' Jesus tasxte utxaana kūhçxa':

—Kwe'sxtxi jxpe'ljsa jïçxa weçxak. <sup>46</sup>Naapkaçxha' nasa' Jesusa's tudtxi jxūna u'ljya'.

<sup>47</sup>Txā'wē Jesusa's tuduçte!, Jesus yakh u'ljusa teeçxsa' kçxilxa's jxkuutxi'ljçxa sacerdote npiičthē'jna selpisáa thū'wēs spē'thku.

<sup>48-49</sup>Txajü' Jesusa' nasatxi' na'ljik:

—Adxa' een isath dxuus yatte kaapiya'ljna ūsu' i'kwe'sx ksxavxyte. Nawa txagaçxhíi yu' tudmeeçxa', āçxh yu' peswéethasi'kwe kçxilx petx fxtü atçxa pa'lj, tudçxa jxūna u'ljya'. Nawa Dxus libruete fxi'ljni ūsa' txāa kxtey yuukahn txā'wē yuuça' jïnak we'we.

<sup>50</sup>Txajü' Jesus yakh u'jusawe'sxa' txã'sçxáana nvxihtçxa jxuka ũphna u'jtx.

### Teeçx piçtakx iyuna u'jni

<sup>51</sup>Naapkaçxha' teeçx piçtakx dee pa'çxni yakhçxáak Jesus e'stey u'jweç yu', aça' txã'snawa tuduçtxi yu'. <sup>52</sup>Nawa dee pa'çxni's nvxihtçxa, iyuna u'kh sùpçxáa.

### Judiu nthê'jsawe'sx tasxte Jesusa's kuutxa'jni

(Mt 26.57-68; Lk 22.54-55, 63-71; Jn 18.12-14, 19-24)

<sup>53</sup>Txajü' Jesusa's sacerdote npiiçthê'j tasxte nuypaljtx. Aça' kxte' sacerdotewe'sx, judiu nthê'jsawe'sx Dxus leya's kaapiya'jsawe'sx jxukay pkhaakhetx. <sup>54</sup>Aça' Pedro' Jesus e'ste jxu'kh neeyüuna u'jna ũsu', sacerdote npiiçthê'j yat patxute pa'phkaçx. Sa' patxute neeyüuk policiawe'sx yakh ipx bajçxna. <sup>55</sup>Naapkaçxha' sacerdotewe'sx vxite' judiu nthê'jsawe'sx jxukay pkhaakheçxa, Jesus ewmée yüuni's pakwetx, ewmée yüuni's kpajkçxa kiikhe'jya' sühçxa. Nawa uymeeta'. <sup>56</sup>Txã'wê uymeetewa maafi yu': Jesusa' yuuwesa yuja' jina yuwe ũsu'tx. Nawa txãawe'sx pta'sxni' isamée fxiyfxiyçxáak kaseje'. <sup>57</sup>Txã'wêwewa maafi yu' na'wêtx we'weya' yajkx:

<sup>58</sup>—Jesus we'weçxa': Naa dxuus yat nasaa txaahni's pêtççxa, tekx ente' ki' vxite txaja'nja nasa vxitnimeesa jina we'weni's kwe'sxa' iiwêsê'tha'w jinatx päatxhî'khe'.

<sup>59</sup>Makwe txã'wê we'wetewa, txãawa isamée íçxáak kaseje'.

<sup>60</sup>Txajü' sacerdote npiiçthê'ja' kiiteçxa', Jesusa's na'wêk we'we:

—Na'wêtx päatxhî'khe' ç'txã'sa' ma'wêçxáawa pasya'wameegá'?

Meeçxa' ç'isa yuh txã'jwá'nta? jítewa, <sup>61</sup>Jesusa' teeçx yuweçxáa yuhwa pasme'. Aça' sacerdote npiiçthê'ja' ki'kin pëjxku:

—ç'Idxa' Kristo, Dxus Nçxi'k dxihgá'? jíte', <sup>62</sup>Jesus pasçxa':

—Txã'wêíith. Aça' i'kwe'sxa' uyuune'kwe Dxus Nçxi'k Nasa Yuusa'

Dxus pukate kaçççxa u'pte. Sa' cieluju táaphte kijaçtewa uyuune'kwe jík.

<sup>63</sup>Txajü' sacerdote npiiçthê'ja' peekx athni ropal's úusçxa sudeçxa na'wêk we'we:

—ç'Kijxa'çxáa testigo jwee pejiikxtha'w? <sup>64</sup>I'kwe'sx wêsê'jna ũste na'wêk

Dxusa's açewe'we. Aça' i'kwe'sxa' ç'maa sùjü'kwe? jíte', jxukaysa pasçxa':

—Txã'sa' ikhteçxáa ewna jítx.

<sup>65</sup>Txajü' vxite yu' dxi'pte fxne'sx avxythethna dxi'pal's aphçxatx uka'kana na'jli':

—Mjiyu wakx ç'kimga idxa's uka'ka'? jinatx npeevxysxika'. Aça' policiawe'sxwa txã'wêytxi dxi'pte uka'ka'.

### Jesusa's jiimeeth jina Pedro we'weni

(Mt 26.69-75; Lk 22.56-62; Jn 18.15-18, 25-29)

<sup>66</sup>Pedro' patxute ũste', teeçx u'y sacerdote npiiçthê'ja's selpisáa kühçxa', <sup>67</sup>Pedro's uyku txã'wê ipx bajçxna u'pte. Sa' dxi'pte ew thegçxa, na'jínak we'we:

—Idxwa Nasarethuwe'sx Jesus yakh u'jusag jîte!, <sup>68</sup>Pedro' ãsxĩik:

—Adxa' txã'sa' jiimeeth kimnane'kwe we'we na'swa jĩçxa', kasehna u'jçxa ekajuk ũsu'. Naapkaçxha' atalx we'wek. <sup>69</sup>Aça' txãa u'ya' Pedro's ki' uyçxa' kxtee ũsattxi' na'jĩnak pta'sx:

—Naa piçthê'ja' pejka Jesus yakh yuh u'jusa' jĩnak we'we. <sup>70</sup>Nawa Pedro yu' ki'kin ãsxĩik. Aça' txãa e'su' kxtee ũsawa Pedro's na'jĩnatx we'we:

—Isa, idxa' txãa yakh yuh u'jusag. Galileajuwe'sxçxa íg txãjũ nasa na'wê we'we' jîte!, <sup>71</sup>Pedro' ũusçxa we'wena jurãyku:

—Isa Dxus uyte, i'kwe'sx kxsusu'i'kwe txãa piçthê'ja's jiimeeth jĩçpkaçxha', <sup>72</sup>atalxa' e'z us we'wek. Txajũ' Pedro' Jesus we'weni's yajkxku: Atalx e'z us we'wemeyna, idxa' tekx us ãsxĩijaç yãj yuune'ga adxa's jiimeeth jĩni's. Aça' Jesus we'weni kxtey yuute', Pedro' wala ũ'nek.

### Jesusa's Pilato kusete dukhni

(Mt 27.1-2, 11-14; Lk 23.1-5; Jn 18.28-38)

**15** <sup>1</sup>Txajũ' khikhyna sējēçte', sacerdotewe'sx judiu nthê'jsawe'sx, Dxus leya's kaapiya'jsawe'sx yã'jçxa walasa pwe'sx pkhaakheçxa Jesusa's tudçxa jxũna u'jtx Pilato tasxte kuutxa'jya'. <sup>2</sup>Aça' Pilato' Jesusa's na'jĩnak pëjx:

—¿Idx wãa judiuwe'sxtxi jxkaahsane'ga? jîte', Jesusa' pasku:

—Txã'wê íith. Isa yuh we'weg jĩk.

<sup>3</sup>Txajũ' sacerdotewe'sxa' Jesusa' kĩhtewa jxuka ewmeesa' jĩnatx yuwe ũsu'. <sup>4</sup>Aça' Pilato' ki' we'wek Jesusa's:

—Mwēesē'j, idxa's na'wētix kĩhtewa jxuka ewmeesa' jĩna yuwe ũsu', aça' ¿ma'wēçxáawa pasya'wameegá'? jíte', <sup>5</sup>Jesusa' teeçx yuweçxáa yuhwa we'weme', aça' Pilato' kujk yajkxna neeyũu.

### Jesusa's ikhwa'j vxitni

(Mt 27.15-31; Lk 23.13-25; Jn 18.38–19.16)

<sup>6</sup>Pilato' Paskua fxiesta iisa teeçx preesu txhweete'k nasaa pēyni's.

<sup>7</sup>Txãa ensu' kxte preesu ũsu'k Barabás yaasesa. Txãa piçthê'ja' vxite nasa yakh pkhaakheçxa gobierno yakh puí kiisçxa nasatx wala kiikhe'jsa npiçthê'kh yu'. Txãa pa'gak preesu ũsu'. <sup>8</sup>Txajũ' kxtee nasa pa'jsa', Pilato's pëjxtxi fxiesta iisa ma'wēne' yũ' txã'sa' ãçxwa txã'wēy yũukahn.

<sup>9</sup>Aça' Pilato' pëjxku:

—I'kwe'sxa' ¿judiuwe'sxtxi jxkaahsa'skwe txhweete jxthãasu'á'? jĩk.

<sup>10</sup>Nawa Pilato yu' sacerdote ne'jwe'sxa' Jesusa's ahççxa dukhtewa jiiçxak txã'wê we'we. <sup>11</sup>Nawa sacerdotewe'sxa' nasa jxukaysatx yu'kxwe'wetx, wejxwa Barabasma mitxhwete jĩkahn. <sup>12</sup>Aça' Pilato' pëjxku:

—I'kwe'sx we'weçxa', Judiuwe'sxtxi Jxkaahsa jĩ'i'kwe ¿txã'sa' kĩjkwe yũu jxthãasu'? jíte', <sup>13</sup>txãawe'sx sus we'wena pasçxa':

—Txā'sa' kluuskhē mkaafxuçu'lj jītx.

<sup>14</sup>Txajū' Pilato' pějxku:

—Txā'wē yūukahna' naa piçthē'ja' çkīhga ewmēe yūu? jītewa, txāawe'sx yu':

—Kluuskhē mkaafxuçu'lj jīnaçxáatx sus we'we'.

<sup>15</sup>Aça' Pilato' nasa yakh ew neeyūu wēeçxa, Barabasa's txhweetekaakh, sa' Jesus yu'sa' kaapeçxukwe'ljçxa kluuskhē fxuçkahn dukhku.

<sup>16</sup>Txajū' soldauwe'sxa' Jesusa's jxūna u'ljtx txāawe'sx ūsni patxute. Sa' soldauwe'sx jxukaysatx kxteeçxaçxáatx pa'ya. <sup>17</sup>Khīçxatx Jesusa's jxkaahsa ropa na'wēsa kaapā'çxi'ljçxa, dxikthete yu' çhūçh korona vxitçxa kaafxīkhe'j. <sup>18</sup>Txajū' na'wē sus weyna:

—Judiuwe'sxtxi jxkaahsath jī'ne'ga jīnatx weeçx we'we.

<sup>19</sup>Sa' dxikthega fxtūu zuzsaju pekwe'kwena, fxne'sx avxythethnatx txajx tasxte peejxūkwe'. <sup>20</sup>Txā'wē yūuna jxā'ljçxa', jxkaahsa ropa na'wēsa's ksūupi'ljçxa, txajx ropa's ki' kaathe'ljtx. Txā'wē yūuçxatx kluuskhē fxuçya' jxūna u'lj.

### Jesusa's kluuste fxuçni

(Mt 27.32-44; Lk 23.26-43; Jn 19.17-27)

<sup>21</sup>Aça' çxhabu kasehna u'ljweçte', teeçx piçthē'j Simon yaasesa's puutx uyçxa soldauwe'sxa' txā'snatx Jesus yakhni kluusa's kxaakhe'ljçxa pe'ljna u'lj. Txāa Simon yu' Alejandro Rufxowe'sx neyku yu', Cirene kiwetewe'sx.

<sup>22</sup>Txajū' Jesusa's teeçx ahte Golgota yaasesatetx pe'ljna u'lj. Txāa Golgota yu' Uusáa Dxikthé Dxi'thçxáasa jīni'. <sup>23</sup>Kxtee pa'ljçxa', vxinote yaasa ka'daçxatx yus wēe, nawa Jesusa' tudxme'.

<sup>24</sup>Txajū' kluuskhē fxuççxa', soldauwe'sxa' Jesus ropatxi's txudeedeçxa swerte kaahx txajx kaaçni atxha's maa soldau knaytewa jiyuya'.

<sup>25</sup>Kusíi las nwewetetx Jesusa's kluuskhē fxuç. <sup>26</sup>Sa' kīh yūusatē txā'wē kluuskhē fxuççxawa pta'sxna fxi'ljçxa ki'ptxi kluus vxīçte: Judiuwe'sxtxi Jxkaahsa' jīna. <sup>27</sup>E'z nasa seena' yuuwesa yu'tx txāawe'sx yakhtxi Jesusa's pdxi'p kluuskhē fxuç. <sup>28</sup>Aça' Dxus librute fxi'ljni' kxtey yuuk: Nasa ewmeesathas yuuwesa yakhku ki'pni yuu jīna fxi'ljni'.

<sup>29</sup>Txajū' kluus tasxuy uykhēwsa' dxikthetx kaawūhnatx weeçx we'we':

—Dxuus yata's idxa' pētçxça tekh ente' ki' kiisu'nja çjī'çmeegá'?

<sup>30</sup>Txā'wē ājāwa'jsaçxa' çmjīitega kluusuh peekíi iyuçxa sa'lja'çmēe? jī'tx.

<sup>31</sup>Aça' Dxus leya's kaapiya'jsawe'sx, vxite' sacerdotewe'sxwa na'ljīnatx weeçx we'we':

—Vxite yuutxi' nwe'weçxawa, peekíi yu' ya'nwe'weya' ājā'çme'.

<sup>32</sup>Israelwe'sxtxi jxkaahsa Kristoth jī'k na' txā'wē dxihçxa', açxhíi kwe'sx uyna ūste kluusuh sa'ljana aç yuuçxáa txā'wē dxih yu'ga sūjū'nja'w jī'tx. Txā'wēy txāa yakh kluuskhē fxuçni u'psawe'sxwa Jesusa's wēesxu'tx.

### Jesus uunii

(Mt 27.45-56; Lk 23.44-49; Jn 19.28-30)

<sup>33</sup>Txajü' ěepxāh wala ānitate!, naa kiwete jxuka çxhi'dxku kusuçte las trestepkaçx. <sup>34</sup>Txā'wē çxhi'dxni las tres ājāçpkaçxha!, Jesusa' na'jīnak sus we'we:

—Eloi, Eloi çlama sabaktani? jīk. Txā': Adx Dxusgu sa' çmjī pa'gaga adxçxāana nvxiht? jīni'.

<sup>35</sup>Aça' nasa kxtee wēsē'jna ūssa' Eliasa's pa'yaça' jītx. <sup>36</sup>Naapkaçxha' teeçxsa' wuwuuna u'lçxa, vxino pussate esponja's akhçxa fxtūute açhçxa Jesus yuwete utxak çxazxakahn. Sa' na'jīk:

—Sxuuna' thegna meswe, aan Eliasa' kluusuh spajkxya' pa'jana jīk.

<sup>37</sup>Txajü' Jesusa' ki'kin sus we'wenitee uuna kājik. <sup>38</sup>Naapkaçxha' dxuus yatte txudenisa liensu pesath a'kxnisa' peekxçxāa sutek puupxājkhē kute ēēju kiwete kīh. <sup>39</sup>Aça' kluus dxi'pte ūssa soldau kpiitana' Jesus txā'wē sus we'weçxa uuçte uyçxa, na'wēk we'we:

—Naa piçthē'ja' isa Dxus Nçxi'k yuh yu'ga jīk.

<sup>40</sup>Txā'wēy u'ywe'sxwa jxu'ju thegna ūsu'tx. Aça' txāawe'sx ksxavxyte!, Salomé, vxite' Maria Magdalena vxite' Maria Jakobo Josewe'sx nji'j txāawe'sxtxi yu'. (Txāa Jakobo's nuuçxsa' jī'tx). <sup>41</sup>Naa tekx u'ysa' Jesusa's selpiina u'jusatx yu' Galilea kiwesu. Nawa txāawe'sxçxāamée, vxite u'ywe'sxwa Jesus yakh ih Jerusante pa'jsatx ūsu'.

### Jesusa's pedani

(Mt 27.57-61; Lk 23.50-56; Jn 19.38-42)

<sup>42</sup>Jxkaasewa'lj en ājāçte!, kīhnawa jxuka pheu'ljçxatx nvxiitu'. <sup>43</sup>Txāa pa'gak kusuçte' José Arimateajūwe'sxa' Pilato tasxte ūukhmée utxāa Jesus kakwe's pējxya'. Txāa José yu' judiu ne'ljwe'sxsa íççxāak yu', sa' Dxus jxkaahwa'lj ena' dud āhwaça' sūhna yaakxsak yu'. <sup>44</sup>Txā'wē Jesusa' uuyā'kh jīni's jiyuçxa, Pilato' wala kuh yajkxçxa soldau kpiitana's pa'yak pējxya' txā'wē Jesus uudxihtewa jiyuya'. <sup>45</sup>Txajü' kpiitana': Jesusa' uuyā'kh jīna pta'sxte!, Pilato' Jesus kakwe's jxūna u'khaakh. <sup>46</sup>Aça' Josea' Jesus kakwe's spajkxçxa, liensu fxinusa weyçxa kxteek yap. Sa' jxūna u'lçxa kwet kafx u'se phadenisa ji'phuk txkaa khikhçxa, u'kani kafxte yu' kwet walasajuk aph. <sup>47</sup>Txā'wē yūuçte!, Maria Magdalena vxite Maria José nji'j txāawe'sxa' Jesus kakwe's mkaa khikheçtewa uytxi.

### Jesus ki' itxi yuuni

(Mt 28.1-10; Lk 24.1-12; Jn 20.1-10)

**16** <sup>1</sup>Txajü' jxkaase en skhēwniite!, Maria Magdalena vxite' Maria Jakobo nji'j, vxite' Salomé txāawe'sxa' wēt putasá weytxi Jesus kakwete sxūsxya' u'jya'.

<sup>2</sup>Txajū' kuskuskhē wala kusíi u'ljtx, sa' sek kâjaçte' pedaní kafxte pa'ljtx. <sup>3</sup>Sa' kxtee pa'jaççxa', na'jĩnatx txāawe'sx pwe'sx we'we':

—¿Kim pedaní kafxte aphnisa kwet wala's kiisukx? jĩ'tx. <sup>4</sup>Txajū' pedaní kafxte thegçxa', aphnisa kwet wala' kiisçxa pukate ki'pni u'ptetx uy. <sup>5</sup>Aça' pedaní kafxte u'kaçxa', teeçx piçtakx ropa çxihmesa jxu'lja athçxa paçu ju'gu kaççxa u'pte uyçxa', wala ũukhtxi. <sup>6</sup>Nawa txāa piçtakxa' na'wēk pta'sx:

—Ũukhnuwe. I'kwe'sxa' Jesus Nasarethuwe'sxa's kluuskhē fxuçni uuk txā'snai'kwe pakwé'. Nawa txā' ítĩ yuuyā'kh, txāasa ayga meeyā'ja'. Aça' khikhniga mthegwe wakx, kĩhwa meea' jĩçxa' kaakh na'jĩna: <sup>7</sup>Txāa yakh u'jusawe'sx vxite' Pedro txāawe'sxtxi na'jĩne'kwe: Jesusa' i'kwe'sx yaçte u'jweça' Galilean, aça' kxtee txā'sa' uyuune'kwe ma'wēga uumeywa pta'sx txā'sa' kxtey yuuna jĩkaathe', <sup>8</sup>txāawe'sxa' pedaní kafxu wala ũukhna ũphna u'jçxa, kuh yaakxnite vxitesa yuutxi' dxi'the kim yuhtxwa pta'sxmeetx u'j.

### **Maria Magdalena's Jesus vxyaani**

*(Jn 20.11-18)*

<sup>9</sup>Txā'wē jxkaase en skhēwnijū' Jesusa' ki' ítĩ yuuçxa', Maria Magdalena khuē'yna vxyaak, na'wē siete eçx luuku vxit-satx kutxi'kh txā'sna. <sup>10</sup>Aça' txāa u'ya' Jesus yakh u'jusawe'sx tasxna u'jçxa, pta'sxku. Txāawe'sxa' nxsuçxa ũ'nenatx u'p yu'. <sup>11</sup>Sa' Jesusa' ítĩ yuuga aça' ũ'kwe' uythu jĩna pta'sxtewa, weh yuhwa txā'wē yũune' sũjũ'çmeeta' txāawe'sxa'.

### **Jesus fxiy yuuçxa vxyaani**

*(Lk 24.13-35)*

<sup>12</sup>Txāa entey Jesusa' ki' vxyaak fxiy yuuçxa, txāa yakh u'jusawe'sx e'zsa dxi'the u'jweçte. <sup>13</sup>Aça' txāawe'sxwa ki' sxawedçxa, Jesusa's txā'wē uytha'w jĩna vxitetx pta'sxtewa, txā'wē uyne'ta sũjũ'çmeeta'.

### **Jesusa' txāa yakh u'jusawe'sxtxi neewe'weçxa nvxiitni**

*(Mt 28.16-20; Lk 24.36-49; Jn 20.19-23)*

<sup>14</sup>Txā'wē pta'sxna jxāl'jaçpkaçxha', txāa yakh u'jusa oncesa mesate kaççxa u'pte ki' vxyaaçxa', na'jĩk:

—¿Kĩh yuuçxakwe adxa'sa' ki' ítĩ yuune' sũjũ'çmée? Adx pta'sxni's ũuste yu'akhya' ājā'çmeei'kwe, sa' ítĩ yuute uysáa pta'sxtewa txā'wē uyne'ta sũjũ'çmeei'kwe.

<sup>15</sup>Txajū' na'jĩnak jxkaah:

—Me'jwe, Dxus yuwe's pta'sxya' nasa jxukaysatx maa kiwete mteewa jxuka. <sup>16</sup>Aça' maawa adxa's ũusuh jxuka yajkxna jxpa'gaçxa yu'te ya'bautisaĩna txā' nwe'weni yuuna. Nawa adxa's ũusuh jxuka

yajkxna jxpa'gasame' Dxus kastigo's knayuuna. <sup>17</sup>Adxa's ũusuh jxuka yajkxna jxpa'gasa' na'wẽ yũuya' ãjãtxna: Adx pu'çxte', eçx luuku vxit-satxwa nasaa ũusuh kutxi'jixna. Sa' yuwe fxiysajuwa we'wetxna. <sup>18</sup>Ul wesweetxwa kuseju uweetxna. Sa' makwe weneno's tudxtewa, kĩh yuhwa kãaçã'jmeena kakwete. Sa' ãçã'sa kakwete peekiizeçxa, Dxus yakh puutx we'wete', katxhitxna jĩk.

**Jesus cielun u'jni**

*(Lk 24.50-53)*

<sup>19</sup>Txã'wẽ yu'kxpehni e'su', kwe'sxtxi jxpe'jsa Jesusa' cielun pe'jna u'jni yuuçxa, Dxus pukate kaçxku paçu ju'gte. <sup>20</sup>Aça' txãa yakh u'jusawe'sxa' u'jçxa', Dxus yuwe's mtee mteewa pta'sxtxi. Txã'wẽ kwe'sxtxi jxpe'jsa pu'çxte', kĩjkĩh yũuya'wa ya'ãjãk, txãa pa'gatx txajx we'weni' isasa yuhna sũhwa'ja's ji'phu'.